

الدرويش والغازية

كوميديا خيالية غنائية

شعبية فانطازية

محمد عناني



الهيئة المصرية العامة للكتاب

١٩٩٤

الـفـلـاـف : نـجـوى شـلـبـى

الـاـخـراج الفـنـى : أمـيـمة عـلى أـحمـد

تجرى الأحداث فى الزمن الحاضر وفى الجاهلية
وفى عصر بنى أمية - فى عهد الخليفة الوليد
ابن يزيد والخليفة يزيد الناقص
وهى بالعامية المصرية والفصحى المعربة

الشخصيات

١- أبو صباع	درويش نصاب
٢- فتحية الغازية	مطربة وصاحبة مشروع شركة كاسيتات
٣- عيد الله	خليفة الدرويش
٤- عتريس	مساعد الدرويش
٥- الهوانم	(تفديه وأغادات ومفيدة)

الفرقة

٦- الرئيس شنشال	رئيس الفرقة - مؤلف وملحن
٧- ريشة	طبال
٨- شحنة	كمنجاتي
٩- منيرة	راقصة
١٠- سعية	راقصة

المشاهد التاريخية :

١١- الوليد بن يزيد	خليفة فاسد
١٢- الشهباء	(تلعبه فتحية) زوجة الخليفة يزيد الناقص

١٣- المنذر
١٤- الفاتح
١٥- حنظلة
ضباط شرطة الخليفة

١٦- عكرمة
١٧- خزيمه
١٨- جبار
جاهليون

١٩- ابن الرقاع

٢٠- نوار ورياب قينتان

أبناء الريف :

٢١- حسين
٢٢- عليوة

٢٣- الزربون
٢٤- سمونة

٢٥- الحاج غضبان شعير

حراس وجوار ورجال من الريف والجاهلية والعصر الأموي

المشهد الأول

أبو صباع : (داخلا) مساء الخير عليكو .. اسمى أبو
صباع .. ويمكن بعضكم فاكرنى من أيام مسرحية
المجاذيب .. لكن أنا بقيت حاجة ثانية دلوقت ..
اتثقت .. أى والله بقيت مثقف .. بس إيه بقى ..
مش ثقافة اليومين دول بتاعة (صرطر)
وتشاكوفسكى .. لا .. ثقافة زمان .. ثقافة السلف
الصالح .. حتقولو لى إيه الصالح دى ؟ هو فيه
سلف مش صالح ؟ حاقول لكم عندكم حق .. كل
السلف صالح .. أمال إيه ..

عتريس : (داخلا) معلمى .. معلمى ..

أبو صباع : إيه ياله فيه إيه ؟

عتريس : فيه ناس تانيه جايه م البر التانى ..

أبو صباع : طب وماله .. دخلهم المنصرة ..

عتريس : المنصرة فيها الهوانم ..

أبو صباع : هم لسه ماخلصوش ؟

عتريس : أصل الست غلباوية ومدوخاهم ..
أبو صباع : طب دخلهم حوش الذكر ..
عتريس : لسه العيال بيجهزوه ..
أبو صباع : خلاص .. خليه بيجوا هنا أول ما يوصلوا ..
عتريس : هنا يا معلمى ؟
أبو صباع : أيوه هنا .. انت ما سمعتش ؟
عتريس : قصدى انك لسه مالبستش يا معلمى .. لسه مش جاهز ..
أبو صباع : طب يالله انجر جيب اللبس .. (يتطلع عتريس نحوه مترددا) ايه ياد فيه ايه ؟
عتريس : حتلبس هنا قدام الناس ؟
أبو صباع : وانت مالك انت ؟ امشى انجر جيب العدة ..
(يخرج عتريس)
عتريس ده الصبى بتاعى .. ايدى اليمين .. كان معايا برضه أيام المجازيب .. لكن دلوقت كبر وبقى طماع .. اتعلم الملاوعة والكذب ..
(يعود عتريس بصرة يلقيها إليه ويخرج دون كلام)
يعنى زى ما انتوشايفين .. (يفتح الصرة ويبدأ فى لبس زى الدرويش)
أنا بقيت درويش .. شغلانه مش بطالة وتربطك بالسف الصالح .. والغريبة إنى أول ما ادروشت ماكنتش مصدق انى أقدر أكمل المشوار لآخره ..

لكين لما قرئت بقى الكتب اللي فى خزانة الشيخ
متولى الله يرجمه لقيت العملية سهلة جدا .. يعنى
الجهد اللي كنت خايف منه طلع حاجة بسيطة
جدا .. ليه؟ لأن الناس هنا .. فى أبو الريش ..
عايزين يصدقوا .. يعنى من غير محاولة ولا
مدالية .. صدقوا انى درويش وقصدونى بالخير ..
اللى عايز يشفى من مرض ومايحيش الدكثرة ..
واللى عنده قرشين عايز يتبرع بيهم لجامع
جديد .. واللى عليه ندر يدفعه للفقراء .. واللى
عايز يشيل أمانة .. كله بيجيلي .. وأنا ساعات
أتمنع وساعات أقبل .. ولما باقبل بيبقى عندهم
عيد .. المشكلة بقى هى انى كل ما أقرا حاجة من
بتوع زمان أشوفها واسمعها .. اوعوا تفتكروا
دى تهيئوات؟ أبداً .. داكنت باقرا تاريخ الطبرى
داك النهار .. يا سلام! كتاب كله روايات وأخبار
يتمنى الواحد تحصل له .. أبص ألاقى نفسى
رجعت فى الزمن مئات السنين .. أيام الجاهلية ..
أيام الشجاعة والفروسية وعنترة والحاجات
دى .. والأ أيام المعارك الكبرى بين القبائل ..
ياسلام .. كانت أيام .

(يدخل رجلان ملتحيان)

عكرمة : (فى حماس وغضب جنونى) أن أوان الثأر ..

خزيمة : اضرب عُنُقَه ..

أبو صباع : يأنهار اسود .. ايه يا جدد انت وهو ؟

عكرمة : هذا هو كَلْثُومُ بْنُ قُصَاعَةَ ..
خزيمة : عَرَفْنَاكَ مِنْ لِحْيَتِكَ الْحَمْرَاءَ ..
أبو صبياع : لحيّة مِينَ يابا .. دى عيرة ..
عكرمة : إنه قاتلُ أبى حِلَزَةَ ..
خزيمة : جَلَلَهُ بِالسَّيْفِ يَا أبا الْأَسْوَدَ .. جَلَلَهُ يَا عَكْرِمَةَ ..

(عكرمة يرفع السيف)

عكرمة : ماذا تقولُ قبل أن تموت يا كَلْثُومُ؟ كيف تُبرّرُ
فِعْلَتَكَ الشَّنْعَاءَ .. انْطِقْ .. تَكَلِّمْ قَبْلَ أَنْ يَجْتَزِكَ
سَيْفِي ..
خزيمة : فَلْنَحْمِلْ لِحْيَتَهُ الْحَمْرَاءَ مَعَنَا لِلْقَبِيلَةِ .. حتى نَشْفِي
غُلِيلَ الرِّجَالِ وَيَفْرَحَ النِّسَاءُ وَالْأَطْفَالُ ..
عكرمة : وأين أخفيتَ الذَّهَبَ ؟
خزيمة : اقتله قبل أن يفر ..
أبو صبياع : يادى الوقعة السوداء .. وحياتك يا عكرمة يا أبو
الأسود وانت ياسمك إيه .. أنا ما خدت حاجة من
حد ولا قتلت حد ..

عكرمة : لن يُجِدِي إنكارُك أبداً .. تكلم .. تكلم
(يدخل صخر)

صخر : لقد وصل الرجال وبأيديهم سيوفهم المهنددة ..
عكرمة : فَلْنَقْتُلِ الرِّجَالِ .. وَنَسْبِي النِّسَاءَ .. وَنَسْتَعِيدُ
الْأَطْفَالَ ..
خزيمة : كَى تَحْيَا تَقَالِيدُ طَسَمَ

أبو صباع : أنا فى عرضكم .. افهمونى .. أنا بامثل بس ..
عكرمة : مَرَّ الرَّجَالُ إِذْنُ أَنْ يَنْقَضُوا عَلَيْهِمْ ..
خزيمة : (صائحاً) يارجال طسم ..
عكرمة : أَنْ أَوَانَ الْجَدُّ فَاشْتَدَى زَيْمٌ
خزيمة : فَدَلَّهَا اللَّيْلُ بِسَوَاقٍ حُطْمٌ
عكرمة : لَيْسَ بِرَاعِيٍّ إِبِلٍ وَلَا غَنَمٍ
خزيمة : وَلَا بِجَزَّارٍ عَلَى ظَهْرٍ وَضَمٍ
عكرمة : أَنْ أَوَانَ الْجَدُّ بِكُمْ فَجِدُوا ..
خزيمة : وَالْقَوْسُ فِيهَا وَتَرٌّ عَرْدٌ
عكرمة : لَا بُدَّ مِمَّا لَيْسَ مِنْهُ بَدٌّ !

(يدخل جماعة من البدو
شاهرين السيوف، وكلهم ملتج
ويجرجر ثيابا فضفاضة ثم
يخرج الجميع من الناحية
الأخرى للمسرح)

أبو صباع : الحمد لله .. أهم مشيوا .. نشفوا دمي .. كنت
لسه باقرا عنهم فى الطبرى .. وأنا أصلى
موعود .. ما قراش عن حاجة الا تطلع لى ..
(تدخل الهوانم وهما زوجتان منقبتان
تماما وتسيران معا وتحدثان
كالانسان الآلى)
الهوانم : أنت بتكلم نفسك تانى؟ مش تتكلم بقى ؟

أبو صباع : أهلا بمراتاتي بزوجتي العزيزتين ! الخلوة
نورت .. عتريس قال أنكو كتو نايمين ؟ ازيك يا
افادات ؟ ازيك يا تفيدة ؟
الهوانم : (معاً) زى الزفت ..
أبو صباع : ليه ؟ خير ان شالله .. الضيوف قالوا حاجه لا
سمح الله ..
الهوانم : (معاً) انت بقيت ملحوس ؟ انت اتخبطت فى
نافوخك .. والا رجعت تخرف ؟
أبو صباع : ليه بس كفى الله الشر ؟ ايه اللى حصل ؟
الهوانم : كنت بتزعق مع مين دلوقتى ؟
أبو صباع : لا ولا حاجة .. كنت باقرا الطبرى واتهيا لى ان
ان شفت ناس من بتوع زمان هنا .. اى والله ..
ناس حلوين خالص ..

(يدخل الرجلان ووراءهم
الجيش ثم ينهض منهم رجل
ويصيح)

جبار : هل هذا هو كَلْتُومُ بْنُ قُضَاعَةَ ؟
ابن الرقاع : لقد قَتَلْنَا الرَّجَالَ وَسَبَيْنَا النِّسَاءَ وَأَسْرَيْنَا
الأَطْفَالَ ..
خزيمة : لَمْ تَبْقِ إِلَّا هَاتَانِ الْمَرَاتَانِ ..
جبار : أَعْمِلُوا السُّيُوفَ فِي الْجَمِيعِ ..
عكرمة : لا .. النساءُ لَا يُقْتَلْنَ .. النساءُ يُسَبَّيْنِ ..

خزيمة : ساخذ الطويلة ..
أبو صباع : (صارخاً) تفيدة !
عكرمة : وأنا سأسبى القصيرة ..
أبو صباع : افادات !
جبار : ولكن هذا ليس كلثوماً !
عكرمة : ليس كلثوماً !
خزيمة : هل أخطأنا يا مولاي ؟
جبار : إنه صعلوك حقير .. بل ليس من عصرنا ..
(صائحاً) ابحثوا عن كلثوم بن قضاة .. هيا
معي .. إلى الأمام !
(يخرجون كما أتوا)
أبو صباع : الحمد لله أهم مشيوا ..
الهوانم : هم مين اللي مشيوا ؟
أبو صباع : كانوا حياخدوكم ! كانوا حياأسروكم ! كنتو
حتبقوا سبأيا حرب !
الهوانم : هم مين دول يا منيل على عينك ؟
أبو صباع : رجال طسم .. من قبائل اليمامة !
الهوانم : الراجل اتجنن .. اسمع يالوح .. احنا نتطلق
فوراً .. وأهى العصمة فى ايدينا .. يالله بينا ..
أبو صباع : (يفيق) يا نهار أسود .. ؟ استنوا بس .. لحظة
واحدة ..
الهوانم : انت بتحلم وانت صاحى ؟ انت بقيت خلل ؟ احنا
ماشيين ..

أبو صباع : يا نهار موش فايت .. افادات .. تفيدة .. حقكو
على فوقى وتحتى ! ما تزعلوش منى ! دانا كنت
باهزر .. ولا فيه رجالة جم ولا حاجة ..
الهوانم : آخر مرة تخرف .. مفهوم ؟
أبو صباع : احنا دلوقتى فى الضيوف .. عملتوا ايه ؟ عشان
خاطرى .. آخر مرة .. يا حلوين يا طعمين ..
دانتو حياتى .. وأنا أقدر أعيش من غيركم ؟
قولوا .. عملتوا ايه ؟
الهوانم : فيه واحدة م البر التانى زهرها بيوجعها ..
الظاهر انه مراتيزم ..
أبو صباع : نعمل لها زار ؟
الهوانم : زار بلدى يقطع وسطها ..
أبو صباع : ونزود الطلبات شوية ؟
الهوانم : ادبحها .. اسلخها ..
أبو صباع : غنية يعنى ؟
الهوانم : معببة .. اعصرها ..
أبو صباع : ومعاها حد ؟
الهوانم : معاها الندل جوزها ..
أبو صباع : ندل ليه ؟ بخيل والا ايه ؟
الهوانم : جلدة .. نتن .. مية .. قيحة .. لكن بيععبها
عبادة ..
أبو صباع : خلاص .. حاسلخه .. ياللا يا حلوين .. فيه
ضيوف تانيين .. زمانهم وصلوا .. حيسستوا فى
المنضرة ..

الهوانم : عايزنا نهيب ايه ؟
أبو صباع : هيبوا لهم - (مستدركا) قصدى اعملوا لهم
شأى .. رحبوا بيهم ..
الهوانم : وانت عارف حكايتهم ايه؟
أبو صباع : عتريس زمانه جاى .. اتفضلوا انتو ..

(تخرج الهوانم)

من ساعة ما خلصت كتاب الاغانى للأصفهانى ..
وصورة رباب المغنية قدام عيني .. فين أيام الأنس
ومجالس السرور ؟ فين القيان وإبراهيم الموصلى
واسحق الموصلى ؟ الموسيقى دى لغة النفوس ..
لغة الأرواح .. وأحنا بلدنا عفرة جفرة ما
يجيهاش الغوازي الا حلوانى .. فى الموالد .. فى
فرح فى سبوع فى طهور .. ليله ليلتين وسلامو
عليكم .. أه يا ولاد لو عندنا هنا قيان .. يا ترى
رباب دى كان شكلها ايه ؟ كان صوتها ايه ؟
الحنها ايه ؟

(تدخل رباب التى تلعب نفس)

دور الغازية مرتدية لبس العرب القدماء وتغنى)

أين الغوانى والقيان وأين سُمَارُ الشَّرَابِ
تجرى بهم سَفُنُ المَلَأُ الحُمُرُ فى بَحْرِ عِيَابِ
فى كل شَطِّ مَرْفَأٍ يَحْنُو وَحَانَاتِ صَحَابِ
وَبِكْلِ رُكْنٍ يَسْكُبُ النَّدْمَاءُ الحَانَ الرُّضَابِ

يَشْدُو بِهَا السَّارُونَ تَرْجِعاً لِفَاتِنَتِي رِبَابُ
أُوَاهُ يَا رَكْبَ الرُّمَانِ مَتَى تَعُودُ إِلَى الشَّبَابِ
حَتَّى أَعُودَ لَأَرْشِفَ الْأَنْغَامَ وَاللَّحْنَ الْمَذَابِ
وَتَعُودَ فِينَا بِهَجَّةِ الدُّنْيَا وَفَتْنَتِهَا رِبَابُ !

(يدخل عتريس)

عتريس : معلمى .. معلمى .. أنت لسه هنا ؟

أبو صباع : (يفيق من الحلم) ايه ياله فيه ايه ؟

عتريس : الرجاله جايبين الخلوة .. ادخل انت الخلوة

الجوانية بقى عشان العملية .. يالله يا معلمى ..

أبو صباع : ماشى ماشى ..

(عتريس يجر أبو صباع من

يده إلى داخل الخلوة ثم يعود

فى عجلة ليفاجأ بأن رجلين من

أبناء الريف قد دخلا إلى

المسرح)

عتريس : يا أهلا وسهلا بالنور لما يهل ..

عليوة : آمال سيدنا الدرويش فين ؟

حسين : دا قالوا لنا انه هنا ؟

عتريس : زمانه جاي .. أصله بيطلع فى الخلوة على أمهات

الكتب .. داخل فى الغويط واصل ..

عليوة : هو واصل واصل ..

حسين : داحنا سمعنا عنه بركات ياما قوى ..

عتريس : انتو لأمؤخذه عايزينه فى خدمة والا ..

عليوة : والله احنا حدانا قرشين عايزين نشيلهم أمانة ..

عتريس : (يتهلل وجهه) أمانة ؟ يا سلام .. ما فيش أحسن م الأمانة ..

حسين : احنا أصلنا ما نحيش البنوك ولا المال الحرام ..

عتريس : يا ساتر م الحرام يا ساتر !

عليوة : قلنا نشيلهم عند الراجل الصالح ..

حسين : لحد ما تظهر لهم عوزة ..

عتريس : والله يا خير ما اختارتوا ..

عليوة : هم مش كتير ..

حسين : لكن برضه الواحد بيخاف عليهم من ولاد الحرام ..

(فجأة يسمع صوت صنج)

ضخم وتعزف موسيقى مهيبة

وتسلط الاضواء على جانب

من المسرح ويضوع البخور

ويدخل الدرويش

أبو صباع : (داخلا) السلام على من اتبع الهدى ..

عليوة : مولانا الدرويش

حسين : بركاتك يا سيدنا ..

أبو صباع : اجلسوا اجلسوا .. هات الشاى يا عتريس ..

(يخرج عتريس)

خير يا أولادى .. الخلوة نورت ..

عليوة : بنور التقوى والصلاح

حسين : سيدنا الدرويش .. رضاك مطلبنا ..

أبو صباع : عندما يفتحُ الله الأبوابَ على عباده الصالحين،
يُسَبِّحُ عليهم نعمة ظاهرة وباطنة، وَيَهْبِهُم من لدنه
رحمةً، وَيَهَيِّئُ لهم من أمرهم مَرْفَقاً ..

عليوة : أمنت بالله .

حسين : ربنا يوسعها على مولانا كمان وكمان

أبو صباع : أنا لا أفعل إلا ما فيه الخير لأمتي وأهلي

عليوة : احنا حدانا جرشين ..

أبو صباع : حاشا لله ..

حسين : بدنا نشيلهم أمانة ..

أبو صباع : (يسيل لعبابه لسماع الكلمة) أمانة؟ لا يا

أبنائي .. الأمانة هم ثقيل لا أتحملة ..

عليوة : احنا جايين من بعيد واصل يا مولانا ..

حسين : كنا في بلاد الخير وجبنا جرشين ..

عليوة : ولا جادرين نروح البنك ..

حسين : ولا جادرين نروح البوسطة !

أبو صباع : الحمد لله اذن .. (يخرج زمبيلا من عيه)

ضعوها هنا ..

(يخرجان النقود ويضعانها

في الزمبيل)

على بركة الله .. (في لحظة تجلى) ستزيد أثناء

الليل أن شاء الله ..

عليوة وحسين : (في دهشة) تزيد بالليل .. ازاي ؟

أبو صباع : (في نوبة جلاله) في ليلة سبعة من شهر سبعة،

سنة سبعة وسبعين حطيت سبعمية سبعة وسبعين
باكو فى الخلوة ، وفوقهم سبع شمععات ..
صبحت الساعة سبعة وسبع دقائق وسبع
ثوانى .. لقيتهم زايدين سبعة وسبعين باكو !

عليوة : (فى زهول) يا بركة السبع سواجى ..

حسين : جول السبع بجرات ..

أبو صباع : انتوا حطيتو كام ؟

عليوة : ستين

أبو صباع : ما يلزمونيش ..

حسين : حلفناك يا مولانا .. بركة دى المغربية ..

أبو صباع : لازم يبقوا سبعة وسبعين ..

عليوة : نخط عليهم سبعناشر ..

أبو صباع : تحطوا عليهم سبعناشر سبعمية سبعة وسبعين ..

حسين : احنا تحت أمر مولانا الدرويش

عليوة : الراجل بتاع ربنا ..

أبو صباع : يبقى الدين اللى عليكو قد ايه ؟

حسين : عرفناه يا مولانا ..

أبو صباع : (يرن الجرس فى يده فيدخل عتريس) خد يا

عتريس الفلوس دى أمانة .. سلمهم وصل واكتب

عليهم دين بسبعناشر سبعمية سبعة وسبعين ..

عتريس : وان مادفعوش ؟

أبو صباع : حيدفوا .. مضيهم على الورقة ..

عتريس : (يخرج ورقة من دفتر) امضوا ..

عليوة : ما بنمضوش .
عتريس : ابصموا .. (بيصمان على الورقة) اتفضلوا بقى ..
الرجلان : احنا جاعدين للذكر ..
عتريس : يالله معايا ..

(يخرجون معا)

أبو صباع : (إلى الجمهور) الفلوس هى مفتاح السعادة فى الدنيا .. فبين أيام الهنا زمان لما كان الخليفة يُقَطِّعُ الناس الإقطاعات .. وكان يأمر بالمنع والمنع .. وكان الشاعر من دول ياخذ له هبصة على كل قصيدة والثانية .. وكان ياخذ الفلوس يشتري له جاريه والا اتنين .. يا سلام .. والعبيد من حواليه .. والغلمان ..

(يضاء جانب المسرح الأيسر)

فيظهر الوليد بن يزيد جالسا

وأمامه شاعر ومغنية وسمار)

الوليد : طَابَ يَوْمِي وَلِذْ شُرْبِ السَّلَافَةِ
وَلَهَوْنَا بِقَيْنَةٍ عَزَافَةٍ !
إِذْ أَتَانَا الْبَرِيدُ يَنْعِي هِشَاماً
وَأَتَانَا بِخَاتَمٍ لِلْخِلَافَةِ !
الشاعر : هل تأذن لى يا مولاي أن أرد عنك اتهام الظالمين ؟
الوليد : وما اتهامهم ؟
الشاعر : هذه القينة لديها بيتان فى هجائك .. وأكاد أعرف قائلهما .. غنى يا نوار !

الوليد : اليوم يوم أنس وسرور يا نوار .. فلا تُغنى إلا كلُّ
جميل ناصع !

(يدخل حاجب ويصيح :

رسول بالباب)

دع الرسول يدخل .. (يرى الرسول) ماذا وراءك ؟

الرسول : يوسف بن عمر يبلغك أن الأمر قد قضي !

الوليد : هل قتل ابننا هشام ؟

الرسول : بعد أن عذبا عذاباً شديداً ..

الوليد : يا كاتب !

الكاتب : لبيك يا مولاي ..

الوليد : اكتب إلى يوسف بعشرة آلاف دينار .. هيا

(يخرج الكاتب) وأنت يا نوار .. غننا بعضاً من

شعري أنا .. أين نوار ؟

الشاعر : لم تبرح يا مولاي !

الوليد : اكتب عني هذا الشعر واجعلها تغنيه :

لَيْتَ حَظِّي الْيَوْمَ مِنْ كُلِّ مَعَاشٍ لِي وَزَادَ

قَهْوَةً أَبْذُلُ فِيهَا طَارِفِي ثُمَّ تِلَادِي

فَيَبْطُلُ الْقَلْبُ مِنْهَا هَائِماً فِي كُلِّ وَادِي

إِنْ فِي ذَاكَ صَلاَحِي وَفَلاَحِي وَرَشَادِي

الشاعر : لا فُضُّ فُوكَ يَا عَيْقَرِي بَنَى أُمِّيَّة !

أبو صباع : (داخلا المشهد)

مَا أَحْسَنَ الْأَنْعَامَ مِنْ صُنْعِ الْوَلِيدِ

صَدَحَتْ بِهَا نَوَارُ فَانْدَاحَ النَّشِيدُ
وَتَمَآيَلُ الْحَى الْقَرِيبُ مَعَ الْبَعِيدِ
وَأَتَيْتُ أَبْغَى نُزْهَةِ الْيَوْمِ السَّعِيدِ
فِي عَبَقَرِي الشُّعْرِ مِنْ صُنْعِ الْوَلِيدِ !

الوليد : (صائحا) من قائل هذا الشعر ؟

أبو صباع : أنا يا مولاي .. محسوبك أبو صباع !

الوليد : ماذا يعني هذا الرجل ؟

الشاعر : أجنبي يا مولاي ..

أبو صباع : أجنبي أزاى يا جدع أنت ؟ دانا ملك اللغة العربية كلها !

الشاعر : هل يأتين لى مولاي فى مخاطبته ؟

الوليد : أذنت لك ..

الشاعر : (ينتحي بابى صباع جانبا) ماذا فعلت

يارجل ؟ لماذا أهنت الخليفة ؟

أبو صباع : أهنته ؟ أهنته أزاى ؟

الشاعر : لقد وصفته بأنه صانع أنغام ..

أبو صباع : وماله ؟ .. ملحن يعنى .. موسيقار .. زى عب وهاب ..

الشاعر : عب ماذا ؟

أبو صباع : عبد الوهاب الملحن !

الشاعر : من يلحن فى العربية ليس بعربى ..

أبو صباع : مش يلحن .. يلحن !

الشاعر : هِي لُغَةُ فِى اللَّحْنِ .. وَقَانَا اللَّهُ .. الوليد بن

يزيد .. خليفة المسلمين يوصف بأنه مُلْحَن ؟

أبو صباع : أرجوك افهمنى

الشاعر : هذه جناية عقوبتها الموت .. هبى نفسك للموت ..

أبو صباع : يا نهار أسود .. الموت !؟

الشاعر : لا مفر منه إلا إذا ..

أبو صباع : أيوه .. إلا إذا ..

الشاعر : إلا إذا اعتذرت للخليفة فورا بأبيات تمحو هذه

الإساءة .. ولقد ابتسمت لك الأقدار إذ صادف

اليوم بشرى خلافته .. هيا .. ارتجل .. (يدفعه

ناحية الخليفة) ارتجل ..

أبو صباع : مقطوعة تنفع ؟

الشاعر : (هامسا) تنفع .. ان شاء الله !

أبو صباع : الشوقُ برحَ بى والوجدُ مُحْتَدِمٌ

والخلقُ غصُ بما لا يَعْرِفُ الكَلِمُ

قد حَقَّقَ اللهُ مَرَمَانَا وَغَايَتَنَا

وَزَالَ عَنَّا الْأَسَى وَأَنْزَا حَتَّ الْغَمِّ

بَلْ جَاءَ عَهْدُ الْوَلِيدِ الْمُرْتَضَى أَمَلًا

يَزْهَوُ بِهِ الْحُرُّ بَلْ تَزْهَوُ بِهِ الْأُمَمُ

الْوَدُّ فِي خَاطِرِي وَالْحُسْنُ فِي نَاطِرِي

وَالسَّعْدُ حُلٌّ بِمَنْ يَعْتَادُهُ الْكَرَمُ !

الوليـد : (فى سعادة) بخ بخ .. هذا والله هو الشعر !

ولقد اعتادنا الكرم واعتدناه .. أمرنا لك -

الشاعر : (مقاطعا) مهلا يا مولاي ..

الوليـد : لقد أحسن والله وما أنا بمنكره حقه .. أمرنا لك

بخمسة آلاف دينار ..

أبو صباع : ذهب يا مولاي !
الوليـد : (ضاحكا) من الإبريز الصافي يا شاعرنا !
الشاعر : شاعركم ؟ كيف يا مولاي ؟ إنه من العامة يا
مولاي .. بل لا يتكلم العربية .. إنه عى اللسان ..
أجنبي يا مولاي !
أبو صباع : أجنبي في عينك يا شاعر النخس ..
الشاعر : هل سمعت ذلك يا مولاي ؟
أبو صباع : عَفَرَ الْوَلِيدُ لَنَا رَلَاتُ الْأُسْتِنَا
وَزَادَ مِنْ كَرَمِ جَمٍّ وَمِنْ نَعَمٍ !
الشاعر : البيت مكسور ! البيت مكسور !
الوليـد : كُسِرَتْ رَقِيبَتُكَ أَيُّهَا الْحَسُود .. لقد غفرنا لك يا
شاعرنا .. هل تطمع في شيء آخر ..
أبو صباع : لَا يَطْمَعُ الْحُرُّ فِي مَالٍ يُجَادِيهِ
بَلْ فِي مَآثِرِ إِحْسَانٍ وَمَغْفِرَةٍ !
الوليـد : غفرنا لك .. ننصرف الآن إلى شئون الدولة ..
وبابنا مفتوح لك .. هيا يا شاعر معي حتى نُطَيِّرَ
أبياته الجميلة ..

(يخرجان ووراءهما السمار
والجارية - أبو صباع
وحده على المسرح)

أبو صباع : خمسة الاف دينار ذهب .. والجنه الذهب يدخل
في ميتين وخمسين .. يعنى حسبة مليون وزيادة

.. يا نهار ! لكن بقى المهم رباب .. أروح له بكرة
بقصيدة ثانية أطلب بيها رباب ..

(يدخل عتريس)

عتريس : معلمى .. معلمى ..
أبو صباع : (يفيق من الحلم) إيه ياد يخرب بيتك ..
عتريس : إنت لسه هنا باللبس ده .. دا الذكر بدأ .. يالله معانا ..
أبو صباع : وماله .. ماشى ..
عتريس : أصل كمان فيه واحدة ست اسمها - اللهم آتنا
بالشهادتين
أبو صباع : من أهل البلد ؟
عتريس : لا .. دى الغازية .. اللى بتغنى ..
أبو صباع : رباب ؟
عتريس : رباب مين يا معلمى .. فتحية الغازية !
أبو صباع : وعازية ايه رباب .. قصدى فتحية ؟
عتريس : تشوفك فى مسألة خصوصية ..
أبو صباع : وهو كذلك .. قل لها تيجى بعد الذكر ..

(يخرج عتريس)

وأرجع أنا للخليفة !

إظلام

المشهد الثانى

(يدخل الغوازى مع الرئيس
شنشال عازف الأرغول، وريشة
الطبال، وشحنة عازف الرباب -
وفتحية الغازية فى استقبالهم)

فتحية : ايه كل التأخير ده ؟

شنشال : داحنا هنا م الصبح ؟ ! إنتى كنتى فى ؟

فتحية : مش مهم .. يالله يا ريس شنشال .. احنا حنابات

فى الوكالة هنا .. وأنا اتفقت مع الفراش نستخدم

الحوش للبروفة .. يالله يا شحته .. يالله يا ريشة !

شنشال : أمال فى سعيدة ومنيرة ؟

فتحية : معايا أهم .. (تنادى) منيرة .. سعيدة !

(تدخلان)

البروفة ! يالله يا شحته .. يالله يا ريشة أمال !

(ريشة يدق الطبل وشحنة

يعزف وكذلك شنشال)

فتحية : (تغنى)

يا بو الريش إن شالله تعيش
يا سيدنا عايزين بقشيش
يابو الريش مولدك مبروك
يا سلطان غيرك انت ما فيش

الغوازي : (يرددون)

يابو الريش إن شالله تعيش
يا سيدنا عايزين بقشيش

فتحية : كده ما ينفعش ! إحنا عايزين دقة موضه

شحتة : مش هي النعمة الشعبية برضه ؟

فتحية : النعمة موش بطالة .. لكن الدقة مش هي ..

ريشة : مش هي ازاي ؟ دي آخر ألا فرانكه !

فتحية : إفهمني.يا ريشة ! أنا عايزة دقة طيلة زي بتوع

الكاستات .. دقة لا غربى ولا شرقى .. دقة من

بتوع الايام دي

ريشة : دقة بزميط يعنى ؟

فتحية : بزميط ؟ أيوه بزميط ! مأكله دلوقتى بقى

بزميط !

ريشة : طب شوفى كده

(يدق على الطبل دقة غربية

تشبه الدقات المسجلة على

الأورج)

فتحية : براوه عليك يا شحتة !

شنشال : طب بس حيرقص عليها مين ؟
 منيرة : إحنا موش مالين عينك يا ريس شنشال ؟
 شنشال : العفو يا منيرة يا بنتى .. دانتو رقاصات درجة
 أولى .. أنا أقصد الناس ..
 سعادى : هما الناس حيرقصوا معنا ؟
 شنشال : الناس لازم يرقصوا معنا ! دا جزء من مشروعى
 أنا وفتحية !
 منيرة : معنته إيه الكلام ده ؟
 شنشال : افهمونى يا بنات .. الليلة ليلة المولد .. والناس
 اتغنّت والقرش فى جيوبها شخشخ ..
 ريشة : (يدق على الطبله) كده كده كده !
 شنشال : ولاد البلد بقى معاهم فلوس وموش عارفين
 يعملوا بيها إيه .. وبدال ما يصرفوها فى
 الحرام .. يصرفوها فى المغنى وبركات أبو الريش ..
 سعادى : يعنى حتغصبهم يدفعوا نقوط ؟
 شنشال : يا منيرة .. يا سعادى .. افهمونى يا خوانا ..
 شحته : أنا أنغامى بتجيب دهب ..
 شنشال : اسمعنى يا شحته .. (صارخا) أرجوكم !
 (يصمت الجميع) إحنا عاوزين نجم قرشين
 ننفذ بيهم مشروع الست فتحية .. نسجل
 كاستات بلدى عليها صورنا ..
 منيرة : عليها صورتى ؟
 شنشال : صورنا كلنا .. مش حنكلف الشريط حاجة ..
 غيرش هوه إيجار الاستوديو ..

سعدية : واحنا حنغصب الناس يدفعوا ؟
منيـرة : والا حنحط إيدينا فى جيوبهم ؟
سعدية : اللي عايز ينقطنى يرمى الفلوس على ..
منيـرة : أنا ما مدش ايدى واصل ..
سعدية : أنا رقاصة محترمة ..
منيـرة : وانا فنانة محترفة ..
فتحية : عندهم حق يا ريس شنشال ..
شنشال : طب والفلوس .. فلوس المشروع ..
فتحية : سييها على دى .. أنا قلت لك أنا مرتبة ترتيبية تانية !
شحته : لكن احنا ما نرضالكيش ..
ريشه : وراكى رجاله يا ست فتحية ..
فتحية : ونعم بالرجال (تضحك) أنتوا ماسمعتوش ع
الدرويش ؟ (صمت) ده راجل فهلوى من بتوع
زمان .. مش زمان قوى .. حسبة عشرة
خمساشر سنة .. من ايام مجازيب السلطان ..
أنا عارفه سره وفاهماه كويس .. ايامها
كان اسمه أبو صباع .. وحاول يشتري وكالة
أبو الريش ما عرفش .. الناس وقفت له بالمرصاد.
شحته : الله ! (فى استمتاع شديد) الله الله الله !
«بالمرصاد» ! أدى الكلام الحلو اللي يتلحن ..
(يغنيها) بالمرصاد بالمرصاد ..
(على وزن سلم على ..)
ريشه : وعايضا لها دقة فلس ..

فتحية : الرئيس شنشال هو اللي بيألف الكلام ..
شنشال : الله ! أنا فاكر أبو صباع ده .. دا واد عترة
مدقق .. هوه أدروش والأ إيه ؟ يا خسارة ..
فتحية : (تهمس مشيرة لهم أن اقتربوا) أنا رايا له
الليلة .. حاخليه يمول المشروع بتاعنا من بابه ..
شحته : (يغنى) يمول ؟ يمول ؟ أمانة عليك ياليل مول !
(مثل كارم محمود)
شنشال : هوه أدروش والا أنغنى ؟
فتحية : (مستمرة في الهمس رغم إصرار شحته
على الهزل) بقى مليونير .. واجوز اتنين آخر
شياكة .. ومشغل عنده عتريس الصبي بتاع زمان
عشان يساعد في العمليات اللي .. بالي بالك !
منيرة : (محتدة) طب واحنا مالنا يا ست فتحية وماله ؟
سعدية : إحنا فنانين وما نحيش اللي بالي بالك !
فتحية : اصبروا على بس شوية ..
شنشال : حيدنا سلفة ؟
فتحية : بقى اسمعوا انت وهوه .. وهى وهى .. احنا لازم
نخش السوق من أوسع أبوابه .. لازم نلعب
اللعبة مع بعض من غير مناقرة وشغل الشريك
المخالف .. أنا عارفة كل أسراراه وحاقد أخليه
يدينا السلفة اللي احنا عايزينها .. أنا عندي حلم
ممکن يتحقق لو وقفنا جنب بعض واشتغلنا مع
بعض .. وكان عندنا ثقة فى بعض .. لو كاسيت

واحد ضرب .. يعنى علق .. حتبقى فرقة شنشال
للفن الشعبى مطلوبة فى كل مصر .. وفى البلاد
العربية كمان .. وفى أوروبا ..

شنشال : حنعملوا فيديو ؟

فتحية : حنعملوا فيديو .. وسينما ..

منيرة : والنبي يا ست فتحة ؟

سعدية : ونطلعوا فى السينما ؟

فتحية : وحببقى لنا شركة انتاج .. ونمثلوا .. ونعملوا

أفلام غنا وطرب .. ونجيبوا اعلانات

شنشال : ونخشوا التلفزيون ؟

فتحية : والأذاعة .. ونسافروا ..

ريشة : بس الدرويش ده جاب الفلوس دى منين ؟

شحته : احنا مالنا يا ريشة ؟ خرينا فى المطلوب .. ايه

المطلوب يا ست الكل ؟

فتحية : المطلوب ان احنا الليلة نقدم دقة الدراويش اللى

علمتها لريشة الجمعة اللى فاتت .. فاكراها ؟

ريشة : لكن دى خواجاتى أوى !

فتحية : اسمع الكلام يا ريشة آمال .. احنا عاوزين ولاد

البلد يحفظوها ويتهزوا عليها وعازين كل واحد

وواحدة .. صغار وكبار يحبوها وأنا إن شاء الله

حاتصرف مع الدرويش ..

(يدخل عتريس لامثا)

واهو الفرج وصل ..

عتريس : ست فتحية .. سيدنا الدرويش حيكون فى الخلوة

ما بين المغرب والعشا ..

فتحية : (إلى عتريس وحدهما فى مقدمة المسرح)

وأنا جهزت الغنوه .. اعمل حسابك ما حدش

يشوفنى ..

عتريس : أنا جهزت كل حاجة يا فتحية هانم .. أنا

محسوبك ..

فتحية : (إلى الفرقة) واحنا ميعادنا بعد العشا ..

ريشة : (يدق دقة عسكرية) وهو كذلك ..

(ستار سريع)

المشهد الثالث

(عندما يضاء المسرح يكون
الخليفة الوليد بن يزيد جالساً
على العرش ونوار بين يديه تغنى
وحوله الحاشية والشاعر القديم)

نـوار : اسْقِنِي يَا نَدِيمُ كَأْسَ حَيَاتِي
لَذَّةً لَا تَرِيمُ حَتَّى مَمَاتِي
واسْكُبْ الرُّاحَ فِي الْحَنَائِي لَعَلِّي
أَتَسَامَى عَلَى الْأَلَى الصَّادِحَاتِ

الوليد : (منتشياً) الله الله الله ! لمن هذا الصوت يا رباب ؟
أبو صباع : لى يا مولاي !

الوليد : وما تريد منا يا شاعر أمير المؤمنين ؟
أبو صباع : حاشا لله أن أطلبَ مالاً أو جاهاً ... ولكن لى قلباً
تَوَلَّهَ بِقَاتِنَةٍ لَا أَنَالُهَا فَاهُنْتُ وَلَا آيِسُ مِنْهَا فَاهْدَأْ ..
الوليد : اطلبْ مَنْ تَشَاءُ وسوف تنالها ولو كانت نوار !

أبو صباع : مَعَاذَ اللَّهِ أَنْ تَمْتَدَّ عَيْنِي إِلَى مَنْ اخْتَصَّهَا أَمِيرُ
الْمُؤْمِنِينَ بِعَظَمِهِ ..

الوليـد : إِنْ لَمْ تُرِدْ نَوَارَ فَاطْلُبْ مِنْ أَرْدَتْ .. وَلَوْ كَانَتْ فِي
أَقْصَى الْأَرْضِ فَسَوْفَ نُحْضِرُهَا لَكَ بِإِذْنِ اللَّهِ !

أبو صباع : إِنْ لَمْ يَنْطِقْ حَالِي فِي حَضْرَةِ مَوْلَايَ لَمْ يَنْطِقْ
لِسَانِي !

نـوار : أَتَيْنَ مِنِّي كُلَّ صَبٍّ مُسْتَهَامٍ

هَذِهِ الْوَجْدُ وَأَضْنَاهُ الْهَيْامُ
ظَامِيٌّ وَالْمَاءُ يَجْرِي حَوْلَهُ

صَامِتٌ وَالصَّدْرُ يَشْفِيهِ الْكَلَامُ

الوليـد : تَكَلَّمْ يَا رَجُلَ .. قُلْ مَنْ تَرِيدُ وَلَا تَخَفْ ..

أبو صباع : هَلْ يَعْطِينِي مَوْلَايَ الْأَمَانَ ؟

الوليـد : أَعْطَيْتَكَ الْأَمَانَ !

أبو صباع : إِنَّهَا .. إِنَّهَا .. إِنَّهَا رِيَابُ !

(مهممة ولغطين أفراد الحاشية)

الوليـد : (صائحا في هياج) رِيَابُ ؟ جَارِيَةُ خَلِيفَةِ

الْمُسْلِمِينَ ؟ جَارِيَةُ أَمِيرِ الْمُؤْمِنِينَ ؟ يَا حُرَّاسُ !

(يدخل حارسان)

أبو صباع : لَقَدْ أُعْطِيتَنِي الْأَمَانَ يَا مَوْلَايَ

الشاعر : لَقَدْ خَانَ الْأَمَانَةَ يَا مَوْلَايَ ..

الوليـد : وَقَتْلُهُ رَحْمَةٌ بِهِ .. لَنْ أَقْتُلَهُ ..

أبو صباع : وَالْأَمَانُ يَا مَوْلَايَ ؟

الوليد : الأمان لمن يستحقه .. أما أنت فبماذا أعاقبك ..
بالموت ؟

الشاعر : جزاء وفاق يا مولاي !
أبو صباع : لم أقصد يا مولاي أن أريدهم لنفسي .. اسمعني
يا مولاي .. كنت أريد تعليمها الشعر والغناء
فحسب ..

الشاعر : حيلة وأكذوبة مفضوحة !
الوليد : ألقوه في السجن حتى نبت في أمره !
أبو صباع : أنا بريء .. مظلوم ! أرجوك .. أرجوك .. أتوسل
اليكم ..

(يجره الحراس)
(يخرج الخليفة والشاعر
والحاشية ويظل أبو صباع
وحده على المسرح كأنما هو
مقيد بالسلاسل لا يستطيع
حراكا)

أبو صباع : يادى الشورة المهيبة ! يعنى كان لازم ارجع لزمن
الخليفة الزفت ده ! الجاهلية كات أرجم ! يا ترى
رباب دى كان شكلها ايه اللى الخليفة يعنى ..
وقع فيها ؟ طويلة زى تقيدة والا قصيرة زى
افادات ؟ بس لازم كان عليها صوت إيه
بقى ! والله ودخلنا السجن ! عال عال !

أحسن م القتل ! بكرة الخليفة ينسى الموضوع
ويفرج عنى ! وادى قعدة !

(اظلام تدريجي)

المشهد الرابع

(عندما تعود الأضواء يكون
أبو صباع جالسا على الأرض
كانما هو مسجون، ولكنه ما يزال
يرتدى زى الدراويش - والواضح
أنه فى الخلوة طبقا لما يوحى به
الديكور وأضواء العصر الحاضر،
لكنه يقع على الأرض كانما غلت
وقيدت حركته وفجأة يسمع
صوت فتحية تغنى فينتفض
واقفا وقد عاد إلى العصر
الحاضر)

فتحية : (تغنى من الغرفة المجاورة)

يامين يشوف الودع ويقول لى بختى فىن !
قلبي اشتراه الجدع وانداح فى غمضة عين !
أبو صباع : رباب رباب ! لكن دى كلامها كلام اليوم .. لا لا

لا .. مش رباب والا رباب ويتغنى شعبي ؟ بس

«انداح» دى كلمه سؤء قوى !

فتحية : كَمْ كُنْتُ أَشْكُو لِرَبِّى

ظَلُمَ الْبَرَّاءُ لِقَلْبِى

أَدْعُو لِأَمْنٍ مُّجِيبٍ

يَحْنُو وَيَرْحَمُ حُبِّى

أبو صباع : هى رباب ! يبقى الخليفة رضى عنى ! حاخرج م السجن فوراً!

(تدخل فتحية)

رباب ! رباب بلحمها ودمها!

فتحية : سا الخير ياسيدنا الدرويش !

أبو صباع : رباب ؟

فتحية : محسوبتك فتحية ..

أبو صباع : فتحية ؟ انتى .. آمال فى رباب ؟

فتحية : أنا اللي كنت باغنى .. من ورا الستارة!

أبو صباع : (يعود إلى الدروشة) أمنت بالله .. اتفضلى ..

أصلك الخالق الناطق واحدة أعرفها ..

فتحية : أنا ياسيدنا الدرويش غازية على قد حالها .. م

الغوازى اللي ببيجوا المولد كل سنة .. أهه ..

بنلف وربنا هو الرزاق ..

أبو صباع : أمنت بالله .. انتى صهوتك من دهب ..

فتحية : العفو يامولانا .. دا من ترتيل التواشيح وذكر الله ..

أبو صباع : أمنت بالله .. دانتى بلبل مغرد .. سبحان الخلاق

فيما خلق ..

فتحية : استغفر الله يا مولانا .. أنا عندي فرقة موسيقى

شعبية وكنت عايزة أستشيرك فى موضوع

استثمارى مفيد .. مفيد جدا ..

أبو صباع : وأنا من ناحيتي عايز الخير لأهل البلد .. للناس..

لخالق الله .. أي حاجة فيها خير (يصدق في

وجهها) بارحب بيها ..

فتحية : يعني ممكن أفاتحك فى الموضوع .. لوحدنا ..

أبو صباع : ماديحنا لوحدنا يارب

فتحية : فتحية .. محسوبيتك ..

أبو صباع : أقصد يا فتحية .. (ينبهر بجمالها) أنا تحت

أمرك ..

فتحية : لا .. موش حيفع دلوقت .. خلينا لليل ..

أبو صباع : إن كنتى حتأجلى الموضوع يبقى نخليه للصبح ..

فتحية : داحنا ماشيين الصبح .. وكان أملنا فى الله وفى

بركاتك ..

أبو صباع : أصل أنا بأحب اختلى بالليل .. باقرا الأوراد

وباتعمق فى التاريخ .. شايقة المكتبة دى؟ أهو أنا

هاضمها كلها .. شوفى تاريخ الطبرى .. والأغاني -

فتحية : ماهو الموضوع أغاني برضه - خمس دقائق

يامولانا .. خمس دقائق موش أكثر ..

أبو صباع : إذا كان خمس دقائق معلش ..

فتحية : بعد العشا ؟ ساعة كده ؟

أبو صباع : أنا بابى مفتوح للجميع ..

(تدخل أفادات وتفيدة - نفس)

الثوب الأسود وتكلمان معا

مثل الانسان الآلى

الهوانم : الحرة دى .. بتتيل ايه عندك ؟

أبو صباع : أستغفر الله العظيم .. إيه اللى جابكو ؟

الهوانم : شميننا البارفان .. بتعملى إيه يا حُرْمَة يا بَجْجَة ع الصبح ؟

المراة : حقكوا على ياهوانم ..

الهوانم : إنتى فاكراها وكالة من غير بواب ، غورى ياولية لا نخزق عنيكى ..

المراة : أنا باكلّم سيدنا الدرويش .. مولانا الراجل الصالح ..

أبو صباع : (صارخا) بس انتى وهى كفاية كده .. سامحك الله وغفر لكن ..

عتريس .. عتريس !

(يدخل عتريس)

ايه اللى جاب الهوانم دلوقت ؟ أنا موش قلت إنى

فى الخلوة .. أنا موش قلت موش عايز إزعاج ؟

الهوانم : واحنا بقى الإزعاج ؟ والهانم دى مش إزعاج ؟

عتريس : ماحصلش حاجة ياهوانم ..

أبو صباع : أنا بابى مفتوح للجميع .. أنا لا أصد أحدًا عن بابى ..

الهوانم : لا يابا واللى خلفوك .. داحنا عاجزينك

وخابزينك .. يا مدروش يامفرش يا منعش يا

منعش .. لا .. فتح عينك يا عمر ..

أبو صباع : إيه الألفاظ البذيئة دي ؟
الهوانم : ألفاظ ؟ ال يا ألفاظ ! بقى اسمع واوعى .. إن ما
اتلمّيتش وحياءة اللي خلقك .. لانفصصك
ونملصك .. لا نفشفشك ونشدشك .. ونفرتك
ونهرتك ..

أبو صباع : حقكوا على خلاص .. اتفضلوا ..
الهوانم : ونوريها باب السكة معانا .. يالله .. سلامو عليكو ..
(تخرج النساء)

أبو صباع : كات شورة مهبية ..
عتريس : لا يامعلمى لا .. لازم أفكر إن الهوانم شركا
برضه فى العملية ..

أبو صباع : والله أنا زهقت من لسانهم الطويل .. وزهقت م
اللعبة كلها ..

عتريس : معلش يامعلمى .. دول بيدوا منظر برضه ..
وبعدين هما اللى بيوزروا حريم البلد ويجيبولنا
أخبار المهلبية ..

أبو صباع : إيه ياوكة ؟ انت اتعديت منهم والى .. إيه ؟
(يُسمع صراخ فى خارج الدار)
سامع ؟ اتخانقوا تانى والى إيه ؟

عتريس : لا لا لا ... دا الواد عبد الله .. أنا محرم عليه
مايهوبش ناحيتنا .. أما أشوف ماله ..

أبو صباع : عبد الله مين ؟
عتريس : واد مدرّوش من مجازيب زمان .. كان بيشغل
محامى وفلس .. قام انجذب

أبو صباع : طب دخله نشوف حكايته ..
عتريس : يامعلمى دا مهفوف فى عقله .. ضارب خالص ..
أبو صباع : معلش ..

(قبل أن يتحرك عتريس يدخل شاب
فى مقتبل العمر فى حالة انهيار تام
وهو يبكى وينشج ويتاوه)

عبد الله : قافل بابك ليه قدام الغلابة ؟ أنا ياعمى الدرويش
موش قادر خلاص! لازم أموت فوراً .. عايز أموت
يامولانا .. الدنيا قسيت على والعمر طوّل على ..
(يبكى)

أبو صباع : تعالى يا عبد الله تعالى .. قل لى مالك !
عبد الله : وعارف اسمى ؟ مكشوف عنك الحجاب يامولانا ..
أبو صباع : إهدا يابنى اهدا .. (إلى عتريس) إنت لسه هنا؟
اتكل على الله انت ..

(يخرج عتريس)

عبد الله : إلّا اللّٰى يموت نفسه مايروحش الجنة ؟
أبو صباع : أستغفر الله العظيم ..
عبد الله : اللّٰى يَنْتَحِرُ مايروحش الجنة ؟
أبو صباع : أقعد بس .. اهدا .. اشرب شوية مية .. امسح
دموعك واحكى لى ..

عبد الله : ما عايش فيه أمل فى الدنيا ياسيدنا الدرويش ..
أبو صباع : ليه بس يابنى كفى الله الشر !

عبد الله : قبل سيادتك ماتيجى بلدنا .. كان عندنا مجازيب
عاشين فى نعيم .. هنا .. فى وكالة السلطان
أبو الريش .. كان بيجيلنا اكلنا لحاد عندنا ..
وكنا بنعبد ربنا .. ليل ونهار يامولانا .. صابرين
ومؤمنين .. فى انتظار اليوم الموعود .. يوم الموت !
أبو صباع : أستغفر الله العظيم .. دا كلام يابنى ده !
عبد الله : كنا عاشين فى هنا .. بنسبح لله .. ومتفرغين
للعباد .. هجرنا الدنيا .. قاومنا الإغراء .. رفضنا
المجتمع .. وهبنا أرواحنا للخالق .. عارف ليه ؟
أبو صباع : الخالق يملك أرواحنا سواء وهبناها أم لم نهبها ..
عبد الله : بس احنا وهبناها بقى ! عشان الجنة .. الجنة
التي وعد الله عباده المتقين .. حيث ماتتشتهى
الأنفس وتلد الأعين ..
(يندمج فى حلم عريض) كل يوم يامولانا كنت
باشوف فى أحلامى رياض الجنة .. والحسان ..
قاصرات الطرف .. وكات الدنيا كلها بستان
أخضر ينكشف لى بالليل وأنا سارح فى
الملوك .. كات الآخرة على بعد خطوة واحدة
منى .. لحظة فيضان الروح .. لحظة الموت !
أبو صباع : يابنى انت اشتطيت وابتعدت خالص ..
عبد الله : بالعكس .. دانا كنت قربت خالص .. وكنت
حاوصل لولا الملعون خرب أحلامنا ..
أبو صباع : ملعون مين يابنى وأحلام ايه ؟ الكلام ده ما
يرضيش حد أبداً ولا يرضى ربنا ..

عبد الله : بالعكس كنا راضيين وكان ربنا راضى عنا ..

لحد ما طَبَّ علينا اللي خَرِبْ بيتنا .. إلهى يخرّب
بيته مطرح ماهو موجود ..

أبو صباع : قصدك مين ؟

عبد الله : راجل نصاب كان عايز يشتري الوكالة بينا ..

أبو صباع : بيكو يعنى ايه ؟

عبد الله : يعنى كان عايز يعمل استثمار سياحى بالوكالة

والمجانيب .. قاموا هبوا الناس ووقفوا ضده ..

راحت العملية متفركشة ..

أبو صباع : مين ده ؟ وقانا الله السوء ..

عبد الله : كان اسمه أبو صباع .. كلب من كلاب الدنيا ..

وقع عبد للفلوس .. وقع فريسة للدنيا .. دمر

حياتنا .. اتفركشوا المجانيب ..

اللى اشتغل اشتغل .. واللى سافر سافر .. واللى

اتجوز اتجوز ..

أبو صباع : وبعدين ؟

عبد الله : وسابوني !

أبو صباع : انت مالكشى شغلانة دلوقت ؟

عبد الله : أنا عايز أموت ياسيدنا الشيخ .. شوف لى موته

الله يخليك .. خايف انتحر ماروحش الجنة ..

يبقى كل جهدى طلع على فاشوش .. قول لى ..

أموت ازاي .. وأروح الجنة ؟!

أبو صباع : انت مخك ملخبط خالص .. انت مش عارف ان
ربنا بيأمرك انك تعيش العمر المكتوب لك
وماتسبِقش الأجل ؟

عبد الله : شوف لى موته ينوبك ثواب !
أبو صباع : ماسمعتش الحديث : اعمل لدنياك كأنك تعيش
أبدا .. واعمل لآخرتك كأنك تموت غدا ..

عبد الله : أهو أنا عملت لآخرتى .. أموت غداً بقى ..
أبو صباع : لازم تعمل لدنياك الأول .. تحب تشتغل معايا هنا ؟
عبد الله : درويش ؟

أبو صباع : درويش ده ايه ؟
عبد الله : دى الشغلة الوحيدة اللى أعرفها .. أسمع لك
التواشيح .. أقرأ لك الأوراد .. وصوتى حلو
خالص .. اسمع (ينشد) :

يَا لَلَّيْ هَجَرْتُ الْحَيَاةَ .. وَرَأَيْتُ عَ الْآخِرَةَ
وَحَدِّكَ وَلَا مِنْ مُعِينٍ .. فِي عَيْشَتِكَ الْمُرَّةَ
رَأَيْتُ فِي ظِلِّ الْأَمَلِ .. وَفِي أَنْتِظَارِ بُكْرَةِ
الدُّنْيَا فِي عَيْنِكَ سَحَابَةٌ .. فَ السَّمَاءِ عَابِرَةٌ
اصْبِرْ وَأَيُّوبَ كَمْ صَبَرَ وَاسْتَفْهَمَ الْعِبْرَةَ
الْمَوْتُ حَاصِلٌ يَحْزَنُ رُوحُكَ الطَّاهِرَةَ
تَعْرِفْ هُنَا مَالَهُ آخِرٌ .. وَالتَّعْنِيمُ فِكْرَةٌ!

أبو صباع : صوتك حلو .. انت اشتغلت مع الغوازي قبل كده ؟
عبد الله : غوازي المولد ؟

أبو صباع : الجماعة اللي بييجوا كل شوية دول .. اللي
بيحيوا الأفراح والليالي الملاح ..

عبد الله : (يصاب بانتفاضة ورعشة) حاشا لله .. حاشا
لله .. كلهم نسوان .. نسوان .. نسوان .. (كانما
دخل نوبة هستيرية) الشيطان في النسوان ..
النسوان والشيطان .. الشيطان هو النسوان ..
أبو صباع : (قلقا يحاول إسعافه) سلامتك يا بنى .. اهدأ ..
حافرك قُرآن .. لاحول ولا قوة إلا بالله ..
(يريت عليه في حنان وقلق)

سلامتك يا بنى .. (ينادى) عتريس .. عتريس ..
عبد الله : (يهذأ بعض الشيء) فين النسوان ؟ مافيش
نسوان ؟

أبو صباع : حكايته إيه ده ! ده بيرتعش هات لى ميه حالاً !
هات طاسة الخضة ..

إنت لازم جبت سيرة النسوان .. هوا .. (يخرج
بسرعة)

أبو صباع : (يضع يده على رأسه كأنما يقرأ أوراذاً
خاصة ويغمغم)

مَنْ شَرَّ الدُّنْيَا وَمَفَاسِدُهَا .. بَارُقِيكَ
وَبِحَقِّ الْخَلْوةِ وَأُورَادُهَا .. يَحْمِيكَ
مَنْ عَيْنُ عَزَائِلِهَا وَحُسَاوُهَا .. يَنْجِيكَ
وَاللّٰى هَذَا النَّاسُ لَنُعْجِبُهَا .. يَهْدِيكَ!
(يعود عتريس بطاسة الخضة)

عتريس : اتفضل يامعلمى .. (يدرك الخطأ) قصدى

ياسيدنا الدرويش!

أبو صباع : (يسقى عبد الله ماء) اشرب .. بالهنا والشفاء ..
(يريت على ظهره) إنت مش كنت محامى؟
خلاص .. أشغلك مستشار قانونى .. وتعيش معانا
هنا وبلاش حكاية الغوازى ..

عبد الله : (ينتفض بمجرد أن يسمع كلمة الغوازى)
النسوان ؟ النسوان ؟

أبو صباع : ياسيدى خلاص قلنا .. يالله بينا .. أنا عندى
حاجات عايزك تكيفها تكيف قانونى .. وحادفع
لك مرتب وأسكنك فى الأوده اللى ع السطح ..

عبد الله : أكيفها ازاي ؟

أبو صباع : يعنى تطلع لها تخريجة .. تشوف لها صرفة ..
تحللها ..

عبد الله : هو حدا الدرويش حاجة غير الحلال ..

أبو صباع : أمنت بالله ..

عبد الله : لا إله إلا الله ..

أبو صباع : اتفقنا .. تعالى معايا بقى أوريك الأوده والأوراق ..
وتمسك أنت الدفاتر بدال عتريس ..

عتريس : انت بتسخرُونى يا معلمى ؟ قصدى يامولانا
الدرويش ؟

أبو صباع : (نافذ الصبر) بقى اسمع أما أقولك ياد انت ..
(يتدارك نفسه) شغلنا يا ابنى (يعود إلى

الدروشة) يحتاج إلى أسانيد قانونية .. مش كل
الناس تقدر تفهم فعل الخير .. القانون هو
الوسيلة المقتعة والمفحمة .. فهمت ؟ (بنظرة ذات
مغزى) يا الله ياعبد الله بينا .. حاشرح لك
وظيفتك إيه ..

(يخرجان)

عتريس : (وحدته على المسرح) أبو صباغ بيمثل على ..
لكن على مين ؟ دانا أبو التمثيل - دانا ممثل من
يومي .. زمان أيام المجازيب كنت ساعات أعمل
درويش انا كمان .. أشوف للناس البخت وأخذ
اللى فى صندوق الندور .. بصفة سلفة .. سلفة
لاترد ! زى أبو صباغ تمام .. كانت أيام شقاوة ..
لكن كات عيني دايم ع التمثيل الكبير .. التمثيل
العليوى .. وجربت كام دور كده من بتوع الكتب
بس ما عجبتنيش .. خاصة القصة .. يعنى واحد
اسمه أو ديب .. وده من الأدب .. حب يجوز أجوز
امه .. وده من إيه بقى ؟ من قلة النسوان
أيامها .. آه .. وواحد اسمه يوليوس قيصر يوليوي
ده زى شهر يوليوي .. لازم أتولد فى الشهر إياه ..
واللا برضه من قلة الأسامي .. تصدقوا بإيه ؟
كان فيه واحد اسمه أغسطس! وألا الملكة كيلو
بودرة .. كات بتحط على وشها بودرة .. طلعوا
عليها كده .. المشكلة إن الكلام كله بالنحو ..

يعنى لا انت فاهم بتقول إيه .. ولاحد فاهمك

(يمثل دورًا كلاسيكيًا)

أيها الرومان .. يا أولاد الأفاعي .. (يخرج من التمثيل) ليه الأفاعي ؟ وإيه دخل الرمان بالأفاعي ؟ (يعود للتمثيل) لقد طغى الكهنة ويغوا .. أهاها .. وأن أوان الصقر ..

(يخرج من الدور) إنما الصقر ده إيه ؟ ده غير

الأدوار اللي كان نفسى أعملها فى التلفزيون ..

أدوار التراث العربى الهائل .. أتعرض على دور عن

الشعراء .. ياعينى عليهم .. دور واحد اسمه أيمن

بن خريم بن الأخرم بن فاتك .. ماعجبنيش الاسم!

والبيت اللي كان محيرنى هو بيت ابن كوز:

فأنتى تارك لهما جميعاً * ومعتزل كما اعتزل بن كوز

قلت لهم غيروا الاسم مارضيوش .. قالوا ده فى

الأغاني للأصوهانى ! أجدع دور بصراحة هو

دور أبو صباع .. هو يلعب وأنا بلعب .. وهو

عارف .. وأنا عارف .. والمسألة بس مسألة وقت ..

فاكرها صعبة! وعبد الله على فكرة مش عيبط ..

هو ضارب ضارب ! لكن ذكى وزى الجن ..

صدق من قال محامى ! وبرضه يمثل !

أل بيسورق أل لما يسمع سيرة النسوان ! هأع!

طب ده ممثل ابن ممثل! ولو أبو صباع ورأله

الدفاتر والخزنة حيكشف اللعبة ! (يمثل) خلينا

فى التمثيل! تعالى يا بنتى تعالى !

(يخرج من الدور) كان عايز يدبسننى فى جواره
من بتوعه .. لكن على مين ؟! أنا موصب توضيية
تانية خالص (يعود للدور) ما الحياة الدنيا إلا
لهو ولعب .. مشيناهم خطى كتبت علينا ..

(يدخل رجل يحمل صرة ويتجه إليه مباشرة)

غضبان : سيدنا الدرويش .. سلامو عليكو ..

عتريس : (يفاجأ) وعليكو السلام يابنى .. اتفضل ..

غضبان : أنا معايا يامولانا قرشين .. قرشين حلوين
يامولانا ..

عتريس : لكن أنا مش مولى يابنى .. أنا مش عمك
الدرويش ..

غضبان : أمنت بالله .. هو أنا حاغيب عنك .. دانا لسه
سامعك بودانى دول .. خد خد .. امسك ياراجل ..

عتريس : لايمكن يا ابنى .. لا يمكن ..

غضبان : ماتخلينيش أحلف .. (يرمى إليه بالصرة فيلتقطها)

عتريس : لايمكن أبداً .. مش ممكن .. (يكون قد أخذ الصرة)

غضبان : وحياة دى الخلوة .. سلامو عليكو ..

عتريس : استنى ياراجل انت .. مش حتاخد وصل ..

غضبان : عيب يامولانا .. احنا بينا وصلات برضه ؟

(يخرج الرجل)

عتريس : أضرب عليها عوافى ؟ لكن دابو صباع بيشوف
من ضهره !

(يغنى)

وَحَيَاةُ الصُّرَّةِ * وَاللَّى فِي الصُّرَّةِ
وَدَوَاهَا الْغَالِي * لِلْعِيشَةِ الْمُرَّةِ
لَا لِمَ فُلُوسِكُمْ * وَأَسَافِرُ بَرَّةِ
وَأَتَجَوَّزُ وَاحِدَةً * وَأَوَاعِدُ عَشْرَةَ

(يدخل أبو صباع وعبد الله)

أبو صباع : (إلى عبد الله) وسجل عندك اتنين باكو من المعلم
غضبان شعير .. أبو سميح انت عارفه ..

عبد الله : (يكتب في دفتر) إيداع مؤقت برضه؟ من باب
التدوين إلى أجل مسمى ؟

أبو صباع : الله ينور عليك .. خد الفلوس من عتريس ..

عتريس : (يلقى اليه بالصرّة) (يكمل الأنشودة)

مَعْلَهْشْ يَزَهْرُ * خَلَيْنَا لِيَكْرَةَ

(اظلام سريع)

المشهد الخامس

(بعد العشاء، أصوات الذكر في
الخلفية، وموسيقى إيقاعية
خفيفة من بعيد ، وضوء خافت
في الأركان، وأبو صباع يفتح
أمامه كتابا ضخما يقرأ فيه ثم
يضاء النور فجأة ويدخل حارس
من عصر الوليد بن يزيد)

المنذر : قم .. أن أوان الموت !
أبو صباع : موت إيه يا جدع أنت ! لبشت جتتى .. أعوذ بالله!
المنذر : فلنمض إلى الخليفة من فورنا .. فلقد أعد السيف
والنطع
أبو صباع : والله ما نطع غيرك ..
المنذر : (يهجم عليه بالحربة) هيا قلت لك ..
أبو صباع : (وقد بدا الخوف يساوره) أوعى تكون بتتكلم
جد .. (مذعورا) يخرب بيتك ! (محاو لا كسب
صداقته) هم حاكمونى ؟ يعنى صدر الحكم بالإعدام ؟

المنذر : الخليفة أمر بقتلك !
أبو صباع : بالإعدام ؟
المنذر : (يضحك) وماذا يجدى المال ؟
أبو صباع : وهل ذكرت المال ؟
المنذر : ألا تتحدث عن الإعدام ؟ والإعدام يعنى الإملاق ..
أبو صباع : الإملاق ؟ معناه كده بالعربى ؟
المنذر : الفاقة .. الفقر .. ألا تفهم العربية ؟
أبو صباع : بل معناه الموت !
المنذر : هل تحب المال إلى هذا الحد ؟ قم فالخليفة فى الانتظار ..
أبو صباع : حاكمونى .. غيابيا ؟
المنذر : من الذى حاكمك ؟ وما معنى غيابيا ؟
أبو صباع : أليس من حقى الدفاع عن نفسى ..
المنذر : أنا لا أفهمك .. لقد أمرت أن أتى بك .. وإن كنت لا أقر الوليد على ما يفعل ..
أبو صباع : (فرحا) إذن .. المسألة فيها نظر ..
المنذر : يبدو لى أنك غريب عن بلادنا ولغتنا وزماننا .. وأنا لا أعرف جريرتك وربما كنت مظلوما .. ومع ذلك فلا أملك إلا أن أنصاع للأوامر ..
أبو صباع : لكنك لا تقر الوليد على ما يفعل ؟
المنذر : (مقاطعا) ومن ذا الذى يقر الظالم على ظلمه ؟ لكننى جندى .. ولا أملك إلا طاعة ولى الأمر.
أبو صباع : (متشجعا) إذن تستطيع أن تؤخر الإعدام .. أقصد القتل .. ريثما أصلى وأستغفر ربى ..

المنذر : اللهم اغفر لنا جميعا .. هيا .. قم فتوضاً ..

أبو صباع : (ينشد)

مضى الخلفاء بالأمر الحميد
وأصبحت المذمة للوليد
تشاغل عن رعيته بلهو
وخالف فعل ذى رأى الرشيد

المنذر : صدقت ! هكذا ينشد الناس فى كل مكان !

أبو صباع : يا مفرج الكرب يا الله !

المنذر : بل لقد سمعت أنهم سوف يوقعون به .. لله الأمر
من قبل ومن بعد !

أبو صباع : وعندئذ يفرح المؤمنون بنصر الله ..

المنذر : صدق الله العظيم ..

(ضجيج وجلبة عالية)

ويدخل بعض الرجال

شاهرين السيوف)

القاتح : أطلقوا سراح السجناء ..

حنظلة : قُتل الكافر عدو الله ..

المنذر : الحمد لله !

القاتح : أحضروا جميع الرجال إلى قصر زوجة الخليفة ..

حنظلة : قصر الشهباء !

المنذر : سأمّر الجميع .. هيا يا صاح !

أبو صباع : إيه الحكاية ؟ حنروح فين ؟

المنذر : ألم تسمع ؟ إلى قصر الشهباء !
الفاتح : ألا فاعلم أيها المظلوم أن يزيداً الناقص قد أصبح
خليفة للمسلمين ..
أبو صباع : الناقص ؟
حنظلة : هو يزيد الناقص بن الوليد بن عبد الملك بن مروان !
أبو صباع : الناقص ؟
الفاتح : وقد انتهت أيام الوليد .. قاتل معبد ..
أبو صباع : معبد المغنى المشهور ؟
حنظلة : وجبس ابنا الوليد .. الحكم وعثمان ..
الفاتح : بل قُتلا !
حنظلة : دالت دولة الظلم ..
الفاتح : وزوجة يزيد الناقص تريد هذا الغريب فى
قصرها .. لتجعله معلماً للقيان .. يعلمهن الشعر
والغناء .. بعد ما سمعت عنه ..
أبو صباع : أفيدونى أفادكم الله .. هل تم تعيينى مدرساً
للشعر والغناء فى قصر الخليفة يزيد .. الناقص ؟
الفاتح : نعم .. قم واستعد للرحيل ..
حنظلة : الواضح أن شهرتك قد بلغت أسماع الأمراء وهم
يريدونك ..
الفاتح : موعدك بعد صلاة العشاء فى قصر الحريم ..
(إلى الحارس) اتركه حتى يستعد للرحيل
وامض إلى الآخرين فأطلق سراحهم .. هيا بنا يا
حنظلة ..
(يخرج الحارس والرجلان)

أبو صباع : هذا هو المراد .. من رب العباد .. قصر الحريم ..
الجواري الروميات .. البيضاوات القاتنات ..
الحمائم الوادعات :

(ينشد)

رَفَّتْ عَلَى الْأَفَاقِ أُسْرَابُ الْحَمَائِمِ حَائِمَةٌ
تَرْهُو بِأَجْنَحَةٍ تَدِفُ وَأَغْنِيَاتٍ بِأَسْمَةٍ
بِيضَاءٍ كَالصَّبِيحِ الْمُنُورِ زَاغِبَاتٍ نَاعِمَةٍ
الآنَ تَخْفِقُ مَوْجَةُ الْأَشْوَاقِ نَشْوَى هَائِمَةٍ
وَتُحَلِّقُ الْأَحْلَامُ فِي جَفْنِ الرُّغَابِ النَّائِمَةِ
دَارَ الزَّمَانِ لِقَلْبٍ صَبَّ ذِي شَجَوْنٍ عَارِمَةٍ
مِهْيَاتٍ لَا يَشْفِي الْغَلِيلَ سِوَى الْعَيُونِ الْحَائِمَةِ
دَعَاءٍ أَوْ حَوْرَاءٍ أَوْ ذَاتِ الْخَبَايَا الظَّالِمَةِ
الدَّاعِيَاتِ إِلَى الصَّلَاحِ لِكُلِّ نَفْسٍ .. أَثْمَةٍ !

(يدخل عبد الله ومعه الأوراق)

عبد الله : سيدنا الدرويش .. سيدنا الدرويش ..

أبو صباع : ماذا ورايكن يا حنظلة ؟

عبد الله : حنظلة مين يا سيدنا الدرويش .. أنا عبد الله ..

أبو صباع : (يفيق من الحلم) أهلا يا عبد الله .. ماذا ورايكن ..

عبد الله : (ينظر خلفه) ورائي ؟ مافيش حاجة ورائي !

أبو صباع : عايز إيه ؟ حصل إيه ؟

عبد الله : الأوراق دي يا مولانا .. الحسابات .. العقود ..

أبو صباع : مالها ..

عبد الله : سيادتك شفقتها ؟ راجعتها ؟
أبو صباع : طبعا شفقتها وراجعتها .. فيها إيه ؟ اتكلم !
عبد الله : فيها إيه ؟ ! فيها مصيبة ! فيها مصايب !
أبو صباع : يا بني كفى الله الشر ما تقولش كده .. إيه بس
اللى حصل ؟
عبد الله : الكشف والعقود بتقول إن المكتب ده حصل
زيادة عن ثلاثة مليون جنيه ..
أبو صباع : ربنا يزيد ويبارك ..
عبد الله : أيوه لكن الخزنة ما فيهاش خمسين ستين ألف.
أبو صباع : (يدخل فى حالة دروشة شديدة) قرب منى يا
بنى .. استغفر الله العظيم .. ولا حول ولا قوة إلا
بالله العلى العظيم .. تعالى .. إدينى راسك ..
(يضغط على رأسه حتى ينخفض ثم
يحوقل ويسمى ويهلل ويكبر ويبدو ،
وكانما يقرأ قرانا وهو يضغط بيده على
مؤخرة رأسه) الحمد لله قول .. قول الحمد لله
ثلاثاً .. وسبحان الله والله أكبر ..
عبد الله : (يقول وهو مطأطئ الرأس) سبحان الله
والحمد لله والله أكبر .. (يكررها ثلاث مرات)
أبو صباع : يا ابنى انت ولد صالح .. انهض ! (يسمح له
برفع رأسه) شوف .. اللى انت عديتهم دول
سبعين ألف بالتمام والكمال .. والباقى بيدور فى
المشروعات .. بيزيد سبع مرات كل سبع تيام ..

عبد الله : سبع تيام ؟
أبو صباع : وسبع تشهر ..
عبد الله : سبع تشهر ؟
أبو صباع : وسبع سنين !
عبد الله : أمنت بالله .. بس ازاى ؟
أبو صباع : ما تكفرش يا عبد الله .. إنت عقلك أد إيه ؟ ولا
حاجة .. انت بنى آدم .. يعنى نملة .. ذرة صغيرة
فى ملكوت الله .. ما فيش .. إنت فرفوته مخلوقة
من طين .. وأنا العلم بتاعى لدنى .. عارف يعنى
إيه لدنى .. يعنى من لدن سميع عليم .. من لدن
حكيم بصير .. (فى كريشندو) من لدن جبار
قهار .. من لدن ستار غفار .. ادعى له يغفر لك
تطاولك .. ادعى !
عبد الله : استغفر الله العظيم ..
أبو صباع : امسك ! (يعطيه ورقة أخرجها من جيبه) دى
أسماء المشروعات اللى الفلوس فيها .. وضُب
كُشوف الحساب حسب اللى عندك .. ورتب
الأوراق الترتيب القانونى المضبوط .. استخدم
الصيغة الصحيحة فى كل حالة .. أوعى تغلط ..
لأن انا من يوم ورايح ناوى أفرج ع البلد زى ما
ربنا ما فرجها على .. فاهم !
عبد الله : فاهم يا مولانا الدرويش ..
أبو صباع : (يهمس) زى ما فهمتك قبل المغرب .. والا لحقت
تنسى ؟

عبد الله : لا يا مولانا فاكّر ..
أبو صباع : خلاص اتفقنا .. اطلع انت المنضرة بقى .. جهز
أمورك والذى منه .. عشان إنا عندي ميعد مهم
عبد الله : (هامساً) مع بسم الله الرحمن الرحيم ؟
أبو صباع : (يهمس دون أن نسمع فيبدو على وجهه
عبد الله الذهول)

(تدخل الهوانم)

الهوانم : مين اللوح ده ؟
أبو صباع : أهلا بالهوانم ..
الهوانم : البقف ده بيهبب إيه هنا ؟
عبد الله : (يبلع ريقه بصعوبة) دول حريم يا مو .. لانا ؟
أبو صباع : دول الحريم بتوعى يا عبد الله .. تفيدة الطويلة ..
القديمة ..

عبد الله : بسم الله ما شاء الله ..
أبو صباع : وافادات القصيرة .. الجديدة !
عبد الله : أَنْعَمْ وَأَكْرِمُ .. (مذهولاً) اللى ما باين منهم
حاجة .. ولا سنننى واحد ! هكذا الأخلاق ..
الهوانم : انت بتخلق فى إيه يا طور ؟ اغضض بصرك ..
اخفض نظرك ..

أبو صباع : دا عبد الله المحامى .. مستشارى القانونى ..
الهوانم : هنا ما فيش أنون .. موش ناقصين بلاوى ..
عبد الله : لغة راقية ..
أبو صباع : أنا جهزت له المنضرة وحيعيش معانا ..

الهوانم : ما فيش عازب يعيش وسطنا .. لازم يتهب
عبد الله : اتهب ازاي ؟
الهوانم : يتهب يتجوز ..
عبد الله : (صارخاً) اتجوز إيه ؟ مين قال .. مين قال ؟
الهوانم : يا يتجوز مفيدة .. يا يغور ..
أبو صباع : مبروك يا بنى .. مفيدة دى بنت صالحة .. عظيمة جداً ..
عبد الله : ومين قال إني عايز اتجوز ؟ أنا يا مولانا زاهد فى الدنيا .. أنا رايح الجنة يا مولانا .. (صارخاً) أنا حاتجوز فى الجنة يا ناس .. انتوا مالكو ومالى .. لا شأن لى بأمور دنياكم (يصاب بلوثة) لقد هجرت الدنيا كى اتفرغ للعبادة .. لخدمة دين الله .. دين الله مطلبى .. الدين
الهوانم : الجواز نص الدين ..
أبو صباع : صدقتما !
الهوانم : وعتريس حاجيب مفيدة حالاً ..
عبد الله : مش عايز اتجوز يا ناس !
أبو صباع : مفيدة سوف تعلمك دينك وتصحبك إلى الآخرة ..
عبد الله : هالله هالله ع الجد والجد هالله هالله عليه .. بقى اسمع يا مولانا .. أنا عايز ارواح الآخرة عازب .. مش عايز آخذ معايا حد .. عايز اتفرغ فى الجنة
الهوانم : يبقى يغور ..
(يدخل عتريس مع مفيدة وهى قصيرة جداً ونحيفة ومغطاة تماماً بالسواد)

عتريس : (داخلا فى رنة انتصار) وعندك واحد عروسة
مخصوص .. أقدم لكم الأنسة مفيدة !
أبو صباع : شايف الحشمة يا عبد الله .. شايف الإحصان ؟
عبد الله : فين الحصان ؟
الهوانم : الإحصان يا حمار .. يعنى مفيدة مُحَصَّنة ..
عتريس : (ساخراً) هى مُحَصَّنة مُحَصَّنة !
الهوانم : بس يا كلب انت !
أبو صباع : يالله يا عبد الله أُمّال اتهدى بالله .. دى مفيدة
عندها عزبة سبعين فدان وذهب متتل ..
عبد الله : (باكياً مسترحماً) أحلفك بكل غالى ورخيص يا
مولانا .. (يركع)
أبو صباع : ما فيش حلفان .. المكتوب مكتوب .. انت
حتعارض المقدّر ؟ حتعارض أمر الله .. أنا
مكشوف عنى الحجاب وشايف السعد اللى
جايلك .. فزّ يا عبد الله فزّ .. خليك راجل امال ..
عبد الله : طب .. (متردداً) بس اشوف وشها ..
الهوانم : نخزق عينك .. قبل الكتاب ما حدش يبخلق
ويبصص ..
عبد الله : أبصص إيه ؟ مش حتبقى مراتى ؟
الهوانم : يبقى لازم نكتبوا الكتاب الأول .. يالله بينا ..
عتريس : والمولد يا هوانم ؟ مش حتحضروا المولد ؟
أبو صباع : خليك انت هنا .. إحنا حنكتبوا الكتاب ونرستقوا
عبد الله ونحضروا المولد ..
(يخرجون)

عتريس : (بعد أن يخرجوا يزيح ستارة فتدخل
فتحية) البرّ أمان .. حاسبيك أنا بقى لحد ما
يرجع والباقي على الله ..
فتحية : (تغمز له) ما تخافش على ..
عتريس : أنا خايف عليكى منه ..
فتحية : وبعدين معاك يا عطيط ؟ (فى دلال) هى توجة
يتخاف عليها برضه ؟
عتريس : خايف ترتيبنا يروح فى الهوا .. يضحك عليكى
والا يدحلك ..
فتحية : فشر ! أنا عارفه انه غاوى مغنى اليومين دول ..
ومستعد يدفع اللى اطلبه عشان يسمع ..
عتريس : يسمع بس ؟
فتحية : ويكسب ويرجع لأيام زمان ..
عتريس : والله أنا خايف يروح لأيام زمان ما يرجعش !
فتحية : يرجع ما يرجعش احنا يهمننا إيه ؟ ما دام حناخد
الفلوس ونعمل الشركة ونحقق احلامنا ..
عتريس : واشتغل معاكو يا توجة ؟
فتحية : دانت حتبقى ريس العملية كلها .. بس يالله اتكل
على الله وسيب الباقي على ..
عتريس : تعالى اوريكى بقى مكان المهلبية ..
فتحية : ياللا بينا ..

(يخرجان - إظلام سريع)

إظلام

نهاية الجزء الأول

الشهد السادس

(جوارى وعبيد وحراس وقائد

حرس)

المنذر : (إلى قائد الحرس الفاتح) ها هم الأسرى أيها القائد ..

الفاتح : هلى سيباعون فى سوق الجوارى ؟

المنذر : لا أدري والله .. حنظلة هو الذى لديه الأوامر ..

الفاتح : ولكن زوجة الخليفة تريد أن تتنقى منهم من تريد ..

المنذر : نسوقهم إلى قصر الشهباء إذن ..

الفاتح : أوامرى أن يظلوا هنا حتى يحضر من يختار لها من تريد ..

(يدخل حنظلة ومعه أبو صباع)

حنظلة : أمرت الشهباء أن يبقى هذا الغريب مع باقى الأسرى ..

أبو صباع : أسرى ايه يا جدع انت ؟ أنا موش أسير ! أنا معلم القيان فى قصر الشهباء !

حنظلة : (متجاهلا ما قاله) ضعوا القيود فى رجليه أيها

الحراس !

أبو صباع : قيود ؟ قيود إيه الله يخرب بيتك ! أنا معلم القيان!

المنذر : بل أسير لدينا ..

(الحراس يضعون القيود فى أقدامه)

الفساتح : إذا تطاول هذا الغريب جَلَّوه بالسيف ..

أبو صباع : يجللُونى إزاي ؟ يادى الوقعة السوداء ..

المنذر : نَجَلِّدُه مائة جلدة ..

الفساتح : اجلدوه عشرين جلدة حتى يهدأ ..

(الحارس يخرج السوط)

أبو صباع : سابق عليك النبی بلاش جَلْد .. أنا ضهرى تعبان

وما يستحملش جلد ..

حنظلة : أنت غريب وفى حاجة للتأديب ..

أبو صباع : أتأديت خلاص يخلِّهمُك .. (يركع على الأرض

ويقبل قدم المنذر)

المنذر : إذن لا تفتَحْ فَمُكْ وابقَ مع سائر الأسرى

(يدخل رجل غنى عليه

سمات النُّخَّاسين وفى يده

عصا ضخمة)

النخاس : أليس لديكم سوى هؤلاء ؟

المنذر : سَلِّ القائد ..

الفساتح : لَمْ يَعدْ لدينا سوى هؤلاء .. إذ بيع الآخرون ..

النخاس : (يتفحص الأسرى) ليس فيهم من يُشْتَرَى

بدينار ..

الفاتح : تأمله جيداً أيها النُّخَّاس ..
المنذر : إنه شاعر ومغنٍ بارع ..
حنظلة : ولن نبيعه بأقل من مائتي دينار ..
النخاس : (يتأمل أبو صباع وينخسه بالنخاس) هذا
تقدم به العمر وسقطت أسنانه.
أبو صباع : أهو انت اللي عَجَزْتَ وسقطت سنائك .. دانا في
عز شبابي وسنانى تمضغ الزلط ..
النخاس : ويتكلم لغة غريبة ! من أى أرض أتيتم به ؟
(ينخسه ثانياً)
أبو صباع : ابعد العصاية دى لاكسرهما لك !
النخاس : (يضحك) قد نجد له مشترياً من بين السُّرَّاء ..
يُضَحِّكُهُمْ وَيُسْرِى عَنْهُمْ ..
أبو صباع : أما إنك راجل ما تَحْتَشِيشُ .. أنا اشتغل مهرج ؟
النخاس : سانشتره بخمسين ديناراً ..
الفاتح : لا أقل من مائة ..
النخاس : أخذه مع الآخرين .. الجميع بمائة ..
(يدق الصنج وينفخ البوق)
وتدخل زوجة الخليفة
وحولها الجوارى)
الجميع : (فى دهشة ورهبة) الشهباء .. الشهباء ..
الفاتح : مولاتى الشهباء ..
الشهباء : (ملثمة) أين المُغْنَى الذى كنت طلبته ؟

أبو صباع : أنا يا مولاتى .. الحقينى يا مولاتى .. كانوا
عايزين يبيعونى مع العبيد والجوارى .. بقى أنا
وش ذلك برضه ؟ !
الشهباء : (تضحك) ممتع .. مُسلٍ .. رائع !
أبو صباع : سمعتم يا ولاد القردلى ..

(يضحك الجميع)

بتضحكوا على إيه ؟ على خيبتكم ؟ كنتو عايزين
تبيعونى بميت دينار ؟ طب أهو أنا حاروح
للشهباء .. أبقي شاعر القصر ومغنى القصر
ومغنى الملكة ..

الشهباء : أين حنظلة ؟

حنظلة : مولاتى !

الشهباء : ألم أكن أمرت بإحضار هذا الغريب إلى قصرى ؟
حنظلة : هكذا قال الفاتح .. ولكن مولاي يزيداً الناقص
أمر -

الشهباء : (مقاطعة) مولاك يزيد ؟ إننى أنا التى طلبت
الغريب وأجابنى الخليفة إلى طلبى ! من الذى
أبلغك بغير ذلك ؟

حنظلة : لقد أتى الفاتح بالأسرى وأتى المنذر بالغريب ..
وانضم الغريب إلى الأسرى ..

الشهباء : (صارخة) من الذى عصى أمرى حتى أعاقبه
العقاب الرادع ؟ من الذى حجب العبد عنى ؟

(صمت ووجوم وترقب)

حنظلة ! هل أنت الذى ضم العبد إلى الأسرى ؟

حنظلة : بل ضمه المنذرُ يا مولاتى !

(المنذر يرتجف فرقا)

المنذر : بل أتى به حنظلة إلى وأمر بوضع القيود فى يديه .. أقصد فى رجليه !

حنظلة : بل كان العبدُ فى حراسة المنذر وأنا سقته إلى الفاتح .. أمام المنذر !

الشهباء : بداية الفتنة ! والفتنة أشد من القتل ! أيها الحراس !

المنذر : (يلقى بنفسه على أقدامها) لا يا مولاتى ! بحق كل غال ونفيس .. بحق الحياة نفسها .. لا

يا مولاتى .. غفرانك مولاتى !

الشهباء : ضعوا القيود فى يديه ورجليه .. وسوقوه إلى قصرى حيث يلاقى جزاء الخونة ..

المنذر : (ينكفئ ويتمرغ على الأرض) فلتسألى الشهود يا مولاتى .. اسألى العبد نفسه .. أرجوك يا مولاتى .. اسألى ذلك العبد الفصيح ..

الشهباء : العبد لا شهادة له ..

(يتعلق المنذر بأبى

صباغ ويستحلفه)

المنذر : قل لهم ماذا حدث يا أيها العبد الغريب ؟ هل

ترضى لى القتل ظلماً ؟ ألم تكن فى حراستى

وأتى حنظلة فسألك إلى الفاتح ؟

الشهباء : العبد لا شهادة له ..

أبو صباع : يعنى قُصِرَ الكلام انا بقيت عبد ! (يضرب كفا

بكف) وما بقى ليش شهادة ! لا يا بهوات ! أنا

عارف القانون كويس .. وعارف العملية ماشية

ازاى ! أنا لى أهلية قانونية وشهادتى معترف بيها ..

الشهباء : أنت أسير أيها الفصيح .. والأسير عبد حتى

يُفتدى بأسير .. أو بالمال ..

أبو صباع : يبقى أفتدى بأسير .. أو بالمال ..

الشهباء : ومن قبيلتك التى ستفتديك بأسير .. أو بالمال ؟

أبو صباع : قبيلتى ؟ قبيلتى أبو الريش .. جنب اسكندرية !

(يضحك الجميع)

الشهباء : لم نسمع بهذه القبيلة من قبل ..

أبو صباع : ازاى ؟ قبيلتى عتريس وأفادات وتقيدة وعبد الله

ومفيدة .. وفتحية وشنشال وريشة وشحنة ..

ومنيرة وسعدية ..

(يضحك الجميع)

الشهباء : أليهم من أسراننا من يفتدونك به ؟ أليهم المال الكافى ؟

أبو صباع : هم مش ميت دينار ؟

الشهباء : بل عشرة آلاف دينار !

أبو صباع : لما يكونوا مليون ! عندى خزائن مثلثة !

الشهباء : وأنا لا أقبل أن أتخلى عنك ولو أعطيتُ خزائن

الأرض .. أنت ملك يعينى .. وربما كنت تدرك ما

ملكُ اليمين !

أبو صباع : يا مدام افهمينى !

(يضحك الجميع)

الفتاح : يبدو أنه رومي يا مولاتي ..
حنظلة : هو من أرض رومية ..
أبو صباع : لا .. أنا من أبو الريش ..
الشهباء : اطمئن ايها العبد الفصيح .. فلقد عفوت عن
بذاعتك وأمرت أن تكون مُعلماً للقيان في
قصرى .. ستقيم في الحريم .. وسوف تلقن
الجواري الشعر والموسيقى ..
أبو صباع : يعني ما بقيتش عبد ؟
الشهباء : إذا فعلت ما يرضيني أعطيتك الحرية .. أما الآن
فسوف تمضي معي إلى القصر حتى تستبدل
ملابس جديدة بهذه الملابس الرثة .. وتشهد عقاب
المُنذر على تفريطه فيك .. وعندما تتدحرج رأسه
أمامك ستعرف أن حياة العبودية خير من درجة
الرؤوس !
أبو صباع : لا ! (صارخاً) دحرجي رأسي !
الشهباء : أنت عازف عن الحريم ؟
أبو صباع : عازف !
الشهباء : وحياة الهناء والرخاء !
أبو صباع : عازف !
الشهباء : إذن .. يا فاتح !
(فاتح يخرج السيف ويرفعه)
أبو صباع : طب (متريداً) أشوف الحريم الأول !
اظلام سريع

الشهد السابع

(الاستعدادات للمولد قائمة)

على قدم وساق - أجهزة

موسيقية حديثة وأورك

وزينات وأطفال يجرون هنا

وهناك - يدخل عبد الله

وعتريس)

عتريس : شفت بقى .. وأدى المولد بتاع كل سنة !

عبد الله : لكن دا مش وقت مولد أبو الريش !

عتريس : أنا مش لسه شارح لك العملية ومفهمك كل

حاجة ! ؟ الناس هنا بتحب المغنى والطرب ..

والرجال جيوبيها دافية وعمرانة من الشغل فى

الكفور اللي حوالينا ..

عبد الله : كفر السعود ؟

عتريس : كفر السعود وكفر أماراتى وعمون ويحرون

وقطرون والكوت ..

عبد الله : ربنا فتح عليهم من مافيش ..
عتريس : رجالتنا بيعملوا لهم كل حاجة .. م البيت
والمدرسة للمستشفى والجامع .. أمال أبو تفيدة
ومفيدة اتغنى من إيه ؟
عبد الله : كان بيشتغل هناك ؟
عتريس : أبداً .. كان بيورد لهم أنفاز أيام العز ..
عبد الله : هم اتفقروا ؟
عتريس : لأبس مش زى الأول ..
عبد الله : أيوه .. فاكر أيام المجازيب ..
عتريس : الله ينور عليك ! دلوقت بعد العركة اللي بين كفر
عراك ، وكفر الكوت دخل كفر فابريكا فى اللعبة ..
خلى الناس عايزة مزىكا وزعطونات زرقا
وحاجات الأفرنكا ..
عبد الله : إحنا نهديهم ونرشداهم .. دى حاجة ماترضيش
ربنا أبدا ..
عتريس : الهداية من الله يا عبد الله يا خويا .. وادينى
حكيت لك كل حاجة ومعتمد على الله وعليك ..
وما دام فهمت ووافقت تخش معانا .. قصدى فى
مشروع فتحية .. ما عدناش نحتاج للدرويش !
**(يسمع طبل وزمر ويتوافد
رجال يلبسون الجلابيب)**
عبد الله : الظاهر المولد بدأ !
عتريس : وماله .. أنا عايزك تجرب نفسك فى الغنا وتخش
معانا .. المغنى هو العملة الراجية ..

عبد الله : عايزنى أغنى ألا فرنكا ؟
عتريس : لا يا عبيط .. عايزك تغنى بلدى بس على الأورج
والدريكة ..

(تدخل فتحية وشنشال وريشة
وشحطة ومنيرة وسعدية)

أهم وصلوا .. يالله يارجاله .. اللى يحب النبى
يصلى عليه ..

الجميع : اللهم صلى ع النبى !

فتحية : (تغنى)

(نغمة تقليدية)

ياللى اشتريت الأمل والحب كان مالك
ولقيت فى كل ابتسامة .. دنيا ضاحكالك
قرب وهات إيدك تعالى نبنى ونعمر
إن جيت لدنيا العمل يبقى هنياك

(نغمة حديثة)

إيدك فى إيدى دوا
نرسم حياتنا سوا
واللى فى حبه ارتوى
ينسى مرار النوى

الزربون : (يلطم خديه من السعادة) يالهورى يالهورى

يالهورى !

سمونة : يا قمر منور فى العلالى !

الزربون : (ينشد)

بدر البدور يا مدور
شمس الشموس يا منور
سبحان من خالقها وصور
ورسم سحنتها فى العالى

عبد الله : سحنتها ؟ إيه الالفاظ دى ؟

سمونة : حمار ! حمار حضاوى !

عتريس : غنى انت يا عبد اله !

فتحية : ابعدوا كلکم .. (فى لهجة تمثيلية) الفنانة

منيرة .. (تتقدم لتحى الجمهور وتتقبل

التحية) (الجمهور يصيح : هيه!) والفنانة

سعدية (صياح جماهيرى) حيقدموا لكم رقصة

أبو الريش ! أَلْفُها خصيصاً الفنان ريشة

الطبال .. (يحى الجمهور وصياح) ولحنها

الفنان شحته الكمنجاتى (يحى الجمهور

وصياح) ويقود الأوركستر الماسترو شنشال

(يحى الجمهور وصياح) ..

(إيقاعات تقليدية ثم موسيقى

عزيزة على الأورج ولكن من

«رى»

ريشسة : وبلوقتى بقى أَسْمَعُكو دَقَّةَ كَسَنَاتى ..

الزربون : كَسَنَاتى .. وَسِنَاتُك ! يا حلاوة سِنَاتُك .. وحلاوة

سِنَاتى ..

ريشة : كستأتى يعنى بتاعة كاستأت يا مغفل ..
سمونة : لا ياعم يفتح الله ..
ريشة : اسمع الأول وبعدين قول لا ..
الزربون : طب دنا باموت فيها .. عشان أصوات المغنين
ناعمة ورقيقة ورفيعة .. زى الستات !
سمونة : رجالة عيرة !
ريشة : والله انتو متخلفين عن العصر .. (كانما يلقي
خطبة) الدنيا اتطورت .. والطور اللي احنا فيه
طور الديسكو ..
سمونة : والله ماطور غيرك ..
الزربون : أهو أنا بقى بحب الطور ده .. أصوات ناعمة زى
الحرير ..
سمونة : زى الحريم قصدك ؟
ريشة : يا خوانا افهموا بقى .. عصر المغنى بتاع زمان
راح .. أصوات الرجالة الخشنة خلاص .. احنا
فى عصر تونى ومونى وممودى !
شحنة : والدقة اللي عاملها الأخ ريشة بنت هذا العصر .
بنت هذها اللحظة .. دق يا ريشة !
فتحية : اسمعوا يا ولاد تعالوا .. انتو الشباب .. انتو
المستقبل .. حنرقص كلنا ع الدقة الجديدة ..
(إلى أولاد البلد) وانتو كمان ! كلنا حنرقص
رقص شبابى البنات فيه زى الراجل
سمونة : والراجل زى الست !

شحنة : دق يار يشة ..

(أغنية من أغاني الكاسيات)

الحديثة - إيقاعها جاهز على

الأورج ولحنها يسير لا يكاد يبين)

الزربون : (يغنى)

يَاللّٰى خَبَطْتُ الْإِكْصِدَامَ

وَكَسَّرْتُ فَنَافِيسَ الْفَرَامِ

لِيَهَ الْمَعَاتِبَةُ وَالْمَلَامُ

هَاتِ بِمَكْرَى الشُّوقِ وَالْهَيْامِ

وَتَعَالِ صَلْحُ غُلَطَّتِكَ

يَاللّٰى رَمَيْتُ مُسْمَارَ غَرَامِ

فَرَفَعْتُ لِيْ فَرْدَةً فِيْ مُهْجَتِيْ

هَاتِ الْكَرِيكَ هَاتِ اللَّحَامِ

وَاسْتَبِينَ تَانِي لَشَنْطَتِيْ

وَتَعَالِ صَلْحُ غُلَطَّتِكَ

سمونة : الله ينور عليك يا زربون .. أغنية واقعية ..

شحنة : هو بيشتغل ميكانيكى ؟

الزربون : محسوبك سواق أولى .. وميكانيكى برضه !

فتحية : (إلى عتريس وعبد الله) فهمتوا بقى الناس

عايزة ايه ؟

عبد الله : طب اسمعيني بقى واحكمى .. (يغنى)

أنا كنت فنان وضاع بختي ورسمايلى

نزلت سرق الحياة بهدلت فيه حالي
وراهنت ع الآخرة .. راحت كل أمالي
وقلت أصبر .. يجوز الجو يصفى لى
شكوتى حنة جواز صقع فى العالى
طببت أسير الهنا يارب كان مالى !

(يصفق الجميع بينما)

ينتحي عتريس بفتحية)

عتريس : (لفتحية) أنا دخلت عبد الله فى اللعبة .. هو فى
إيده الأوراق وحايقدر يخدمنا تمام .. (هامساً)
بعد أن يستحبها إلى مقدمة المسرح) المهم
تقنعى صاحبنا يديكى الفلوس الليلة بأى طريقة ..
لازم المشروع يقف على رجله بأى ثمن .. بس
حاسبى يا توجة ..

فتحية : ما تخافش علىّ يا عطعط ..

عتريس : إتكلّى على الله انتى بقى .. وأنا حاخلىنى مع عبد
الله والجماعة لحاد ما ترجعى ..

(تتسلل فتحية خارجة)

(إلى جمهور المولد) اللى عايز ديسكو ييجى
الناحية دى .. واللى عايز مغنى بلدى الناحية
دى ..

عبد الله : وأنا معاكم للصبح ..

ريشة : وأنا حادق ديسكو للصبح ..

سمونة : احنا عايزين بلدى ..
الزربون : واحنا عايزين ديسكو ..
سمونة : يبقى حنقلبها ضلمة ..
الزربون : وانا حادشدها على نافوذك ..
سمونة : انت تدشدها انت ؟
عبد الله : يا خوانا موش كده أمال ..
ريشة : بلاش مغنى خالص ..
الزربون : بلاش ازاي ؟ دق يا ريشة ..
سمونة : غنى يا عبد الله ..

(تبدأ خناقة بالحركات
الصامتة ثم تتوقف الأصوات
وتستمر الحركات ويسقط
الممثلون مصابين بالجروح)

إظلام

المشهد الثامن

(الدرويش تدخل عليه فتحية)

فتحية : مولانا ! اتأخرت عليك ؟!
أبو صباع : أنا عارف إنك انتشغلتى فى المولد .. خير ؟
فتحية : كل خير يا مولانا .. موش عارفة أبدأ ازاي ..
أبو صباع : البداية هى البداية .. وانتى قلتى الصبح إن فيه
موضوع عمل .. يبقى نبدأ بالعمل ..
فتحية : يبقى نقول بسم الله .. الموضوع وما فيه إن احنا
عايزين نعمل شركة كاستات ..
أبو صباع : أستغفر الله العظيم ..
فتحية : لإنتاج الأغانى الشعبية .. والتواشيح والأوراد
والمدائح
أبو صباع : اللهم صلّى على كامل النور ..
فتحية : عليه الصلاة والسلام ..
أبو صباع : ويعدّين ؟
فتحية : ويعدّين عايزين نعمل شركة !

أبو صباع : مانتى قلتى .. يعنى ايه ؟
فتحية : يعنى نشترك !
أبو صباع : عايزة فلوس يعنى ؟
فتحية : عايزة شركة مولانا ..
أبو صباع : والمطلوب منى انا .. فلوس ؟!
فتحية : المطلوب شركة يا مولانا ..
أبو صباع : بقى معقول راجل زبى يعمل شركة موسيقى ؟
فتحية : مافيش حد غيرك يا مولانا ! خصوصاً بعد ما
قرئت كثير ودرست كثير .. الكتب بسم الله ما
شاء الله تسد عين الشمس ..
أبو صباع : وايه دخل القرابة بالشركة ؟
فتحية : مولاي اتغير .. اتغير كثير ..
أبو صباع : لا لا .. أنا طول عمرى -
فتحية : ما تأخذنيش يا مولانا .. أنا باشتغل غازية .. لكن
اعرف زى بتوع المدارس .. واكثر ..
أبو صباع : انتى جاية تدينى درس ؟
فتحية : العفو يا مولانا .. لكن أنا عارفة ان جواك فنان
كبير .. قلبك بيحب الفنون كلُّها .. المغنى
والرقص والموسيقى والتمثيل .. ولولا انى عارفة
ومتأكدة ماكنتش فاتحتك ..
أبو صباع : أستغفر الله .. أنا حياتى وهبتها للخير ..
فتحية : والفن أعلى مراتب الخير .. دانت بقيت تعرف كل
حاجة يا مولانا .. وهو معقول واحدة زبى
حتعرف اللي انت تعرفه ؟

أبو صباغ : بس انتو إمكانياتكو الفنية محدودة ..
فتحية : بالعكس يا مولانا .. انت ما تعرفش عظمة المعلم
شنشال والفنانين شحطة وريشة ومنيرة
وسعدية .. زمان المغنى كان طرب ويس .. لكن
النهارده بقى معانى وحاجات عالية ..

أبو صباغ : المغنى هو المغنى .. لهُو وَلِعِبْ !
فتحية : فشر ! طب اسمع الكلام ده وقول لى رايك -
أبو صباغ : كلام إيه ؟
فتحية : اسمع التلحين الجديد .. والدقة الجديدة !

(تدخل الراقصات وتدق
الحان جديدة كالموشحات)

(تغنى)

لا تَقُلْ غَابَ وَأُحْصِرَ لا تَقُلْ رَاحَ وَأُنْذِرَ
فالذى غَابَ لَمْ يَزَلْ حَاضِرَ الرُّوحِ وَالْفِكْرِ
دَائِمَ الْخَفِّقِ حَائِمًا يَنْفُثُ الرُّوحَ فِي الصُّورِ
وَلَهِيئًا يَنْزِلُ فِي كُلِّ شَوْقٍ إِذَا بَدَرَ
وَأَرِجًا يَضُوعُ فِي نَسَمَاتِ الصَّبَا الْعَطِرِ
وَلِذَا أَعْشَقَ اللَّيْلَا لِي وَأُنْدَاخُ فِي السَّحَرِ
هَبَّ الرِّيحُ فِي دُمِي وَصَدَى بَسْمَةِ الزَّهَرِ
وَضِيَاءُ بَكلِ عَيْنٍ بِهِ يَبْصُرُ الْبَصَرِ
مِنْ هَوَاهُ انْتَضَيْتُ قَلْبًا بِهِ أَعْشَقُ الْبَشَرَ

(تنسحب الراقصات)

أبو صباع : شعر ركيك .. لكن الدقة حلوة !
فتحية : التجديد هو الروح .. واديك شفت وسمعت ..
أبو صباع : (كانما لنفسه) ممكن أعلمه للقيان .. ممكن
أعمل ثورة فى الحريم ! بس الشعر ركيك ..
غاوية الست دى كلمة «انداح» .. (إلى فتحية)
انتى استخدمتى الكلمة دى قبل كده !
فتحية : مولانا .. (فى رقة) أنا معتمدة على الله وعلى
ذوقك فى الشعر والمغنى .. داحنا ممكن نعمل
ثورة فى الموسيقى الشرقية !
أبو صباع : تفكرى القيان حيقبلوه ؟
فتحية : قيان مين يا مولانا ؟ ما عندناش هنا قيان !
أبو صباع : لا لا لا هناك ! الجوارى يعنى .. والله لاخلى
العبيد يحفظوه لهم بالكرباج !
فتحية : مولانا انت بتتكلم عن إيه ؟ هنا ما فيش جوارى
ولا عبيد ! ولا عمر كان عندنا فى مصر جوارى
ولا عبيد !
أبو صباع : بس زمان بقى ..
فتحية : أيوه زمان .. بس مش عندنا ..
أبو صباع : (يجرى إلى بعض الكتب ويحضرها إليها)
شوفى .. أهه .. أهه ..
فتحية : دى كتب عن مصر ؟
أبو صباع : لا .. إنما ..

فتحية : يبقى نعمل الشركة (فى رقة) انت ممكن بخيالك
تعيش فى الماضى .. لكن ما تقدرش تغيره .. اللى
تقدر تغيره هو الحاضر !
أبو صباع : بس شركة مش ممكن ..
فتحية : (تقترب منه فى عزم وتصميم) الشركة
حلال .. والشركاء لما يكونوا راضيين عن
بعض .. وقريبين من بعض .. ومبسوطين من
بعض .. مولانا (فى مواجهة) إنت راضى عنى ؟
أبو صباع : (فى اضطراب رهيب) يا .. بنتى .. يا .. أنا ..
أصلّى .. أنا
فتحية : لما نشترك .. وثثق فى .. وتطمئن لى .. وترضى
عنى .. (المواجهة صريحة) انت راضى عنى ؟
أبو صباع : يا بنتى ..
فتحية : بلاش بنتى دى ..
أبو صباع : إنتى .. أنا ..
فتحية : أيوه تمام .. إنت وانا .. شركا .. شغل واحد ..
مال واحد .. حياة واحدة ..
أبو صباع : دا بين الأز - (يتردد قبل نطق الكلمة) الأز -
الأزواج بس !
فتحية : العفو يا مولانا .. هو انا قد المقام ؟!
أبو صباع : (فى ذهول) مقام .. مقام .. قصدك إيه ؟
فتحية : قصدى هو انا فى ديك الساعة لما نبقى أز ..
أز .. واج ؟
أبو صباع : أنا اتجوزك ؟

فتحية : انت بتعرض على .. وانا .. الدنيا طايبة بى ..
أبو صباع : نتجوز ؟ ازاي ؟
فتحية : فى الشركة يعنى !
أبو صباع : (منهاراً تماماً - يبلع ريقه بصعوبة) فى
الشركة ؟ أى شركة ؟
فتحية : انت راضى عنى يا مولانا ؟ مبسوط منى ؟
أبو صباع : فتحية !
فتحية : مولانا ..
أبو صباع : بلاش مولانا دى ..
فتحية : عاجبك فى .. عاجبك صوتى .. عاجبك ذوقى ..
أبو صباع : (يتقدم منها فى حماس) أنا .. انت طلعتلى
منين ؟ .. تعالى هنا ..
فتحية : لا لا لا يا خبر .. بعدين يا مولانا ..
أبو صباع : ما قلنا بلاش مولانا دى ..
فتحية : وانا قلت بعدين ..
أبو صباع : لما نتجوز ؟
فتحية : نتجوز ؟ يا خبر ! مش لما نعمل الشركة الأول ؟
أبو صباع : نعملها ونعمل أبوها .. (صارخا) واد يا عتريس!
عتريس ! يا عتريس الكلب !
(يدخل عتريس ومعه أوراق)
انت رحت فىن ؟ هات صور عقد فوراً .. وصور
إخطار بنوك ..
عتريس : أنا جاهز يا معلمى ..

أبو صباع : تعمل عقد تأسيس شركة فنية باسم الهانم ..
عايزه يكون جاهز للتسجيل من بكرة .. وخلي
الواد عبد الله يتأكد من الصيغ القانونية ..
عتريس : (من باب جس النبض) هو عبد الله حيخش
معانا يا مولانا ؟

أبو صباع : (يستعيد رباطة جأشه) لازم .. دا محامى ..
ومتقف .. ومخلص ..

عتريس : موش نسيه كام يوم كده يتهنى بالجواز ؟
أبو صباع : (مقاطعا) لا لا لا .. خد وصل فتحية هانم
للكالة .. موش عايز حد يشوفها خارجة من
عندى .. (يعود للدروشة رسمياً) احنا .. احنا
ربنا وفقنا لما فيه الصالح الليلة .. بركة مولد
سيدنا السلطان .. (كانما يلقي خطبة) قررنا
تكوين شركة إنتاج كاسيتات فن شعبى .. حنبدأ
بالمدايح والتواشيح والابتهالات .. وحنركز على
الأصول الثقافية العريقة ..

فتحية : قصدك إيه يا مولانا ؟

عتريس : دا الكلام اللي حينكتب فى عقد التأسيس يا ست
فتحية .. ما تخافيش .. كلام نقاد ..

فتحية : يعنى ونغنى اللي احنا عايزينه ؟

عتريس : إنتو تعملوا اللي انتو عايزينه .. واحنا نكتب
الكلام الصَّحَّ ..

فتحية : طب يالله بينا بقى .. الجماعة حيستعوقونى ..

عتريس : ياللة .. ميعادنا بكرة ان شاء الله .. واسلمها انا
بقى الشيك ؟

(تخرج فتحية وعتريس)

أبو صباع : طبعا طبعا ..

أبو صباع : (وحده على المسرح) وطبعا نخلو الجوازة دى

فى السر ! نشوفوا لها شقة فى اسكندرية والا

نخلو الشقة هي مقر الشركة ؟ (فى منتهى

السعادة) هم القيان راحوا فين ؟ أه لوشافتهم

فتحية .. والالوشافوها ! والا لوشافتها الشهباء !

يا ترى ممكن أخذها معايا ؟ والا أخذ الواد عبد الله ؟

(تدخل الهوانم ومعهما مفيدة

وعبد الله وقد بدت عليه آثار

المعركة - رأسه مربوطة وذرعه

مربوط وحول عينيه سواد)

الهوانم : العريس اتكسر !

مفيدة : بقى شرك !

أبو صباع : خير يا عبد الله .. إيه اللى حصل ؟

عبد الله : (ما زال يتألم) الجماعة عجبهم صوتى .. هاجوا !

أبو صباع : إنت غنيت فى المولد ؟

عبد الله : قلّة عقل يا مولانا ..

أبو صباع : مش عيب مستشارى القانونى يغنى فى المولد ؟

عبد الله : دا الناس كات فرحانة قوى ..

مفيدة : ما يلزمنيش ..

الهوانم : عايزة واحد سليم ..
أبو صباع : إيه الكلام ده انتى وهى .. سليم إيه ومكسر إيه ؟
مفيدة : دا بيرك على رجله ..
أبو صباع : بكرة يصحى .. بكرة يبقى جديد نوفى ..
مفيدة : ما يلزمنيشى ..
أبو صباع : خلاص .. نأجل الفرح .. اتفضلوا ..
الهوانم : يبقى نخليه عندك لحد ما الكسور تتلحم ..
أبو صباع : ماشى .. اتفضلوا .. مع السلامة ..

(تخرج النساء فى خطوة

عسكرية)

تعال هنا يا عبد الله ! أنا عارف ان عتريس قال
لك ع الشركة !

عبد الله : (خائفا مترقبا) هو الحقيقة .. يعنى ..
أبو صباع : اسمع .. اسمعنى كويس وافهمنى كويس .. أنا
عارف إنهم قالولك إن أنا أبو صباع ..
عبد الله : (محتجا فى ضراعة) ! مولانا (لكنه لا يجيد
التمثيل)

أبو صباع : (مستمرا) وإن عتريس كشف لك اللعبة من
طقطق لسلامو عليكو ..

عبد الله : هو قال كلام كده لكن أنا ..
أبو صباع : صدقته ! لأنه هو الكلام الصح ! الكذب مالوش
رجلين ! ومهما لعبت ع الناس بتكشفنى ! أنا ما
بانكرش إنى غلطت .. وبأغلط ! تركيبتى كده !

لكن من يوم ما اكتشفت الماضى وجماله .. وأنا
عاش فى دنيا ما حدش دارى بيها .. وإن شاء
الله ناوى أروح لها .. ويارجع ياما أرجعش !

عبد الله : دنيا إيه يا مولانا ؟

أبو صباع : دنيا التاريخ .. الماضى اللى لا يمكن يتغير .. كان
نفسى أعيش حياة حقيقية ما فيهاش تمثيل ..
لكن فن الصنعة بيغلب .. بدأت بالتمثيل على
الناس .. وعتريس بيمثل على .. وفتحية .. وأنا
بامثل عليهم .. والهوانم ! وانت ..

عبد الله : لا .. موش أنا يا مولاي !

أبو صباع : اسمع .. فى التمثيل زمان كان البطل يواجه واحد
يكشفه .. لكن أنا باكتشف نفسى .. لانى شايف
شبابى فيك .. وبحبك وخايف عليك .. من إيه -
اسألنى ! تعالى معايا أوريك أنا وصلت فى
الدنيا بتاعتى .. (يعطيه كتابا) افتح صفحة
١٢٤٥ - ما تخافش !

(فجأة تسمع ضجة ودقة)

صنج عالية ويدخل حنظلة

ومعه المنذر والقاتح ورهط

من الحرس)

القاتح : (صائحا) أن أوان دحرجة الرؤوس !

المنذر : مولاتى صفحت عنى ! (باكيا) مولاتى وهبتنى
حياتى !

حنظلة : تريث يا فاتح حتى تأتي الشهباء !
الفاتح : لقد عصى الأمر وليس للعاصي سوى القتل !
حنظلة : إذا كانت صفحت عنه فله أن يحيا !
الفاتح : ولماذا لم تأخذوا إليها الرومي ؟
حنظلة : لقد أمرت بأن يصبح مُعلماً للقيان .. ومعنى ذلك
أن يدخل على الحريم ..
ابو صباع : (إلى عبد الله) سمعت ؟ حابقي معلم القيان !
عبد الله : وبقولوا عليك رومي ليه ؟
ابو صباع : مش عاجبهم الكلام بتاعنا ! فاكربنا خواجات ..
الفاتح : إذن فلا بد له أن يستعد ..
حنظلة : هل أخذه إلى الجراح ؟
الفاتح : ليس في هذا شك !
ابو صباع : (داخلاً المشهد التاريخي) جراح إيه يا جدع
انت ؟ دانا في أتم صحة وعافية ! دا مؤكد فيه
غلط .. لازم حصل لبس أو التباس .. بص عندك
في الكشف كويس .. اقرا الأسماء ..
(يدق صنج وتدخل الشهباء
ووراءها جارتان رائعتان)
أمي الشهباء ! أسألوك !
عبد الله : (هامسا) هي دي الملكة ؟
ابو صباع : (هامسا) دي مرات الخليفة .. ومعجبة باخوك
إعجاب تمام !
عبد الله : ودول الجوارى اللي حتعلمهم ؟

الشهباء : (إلى الفاتح) لماذا لم تحضروا الغريب إلى القصر ؟
المنذر : (ضارعاً) مولاتى ! لقد عفوت عنى بكرمك وعطفك ! وأنا مدين لك بحياتى ..
الشهباء : (إلى الجاريتين) فرعاء ! جيداء !
الجاريتان : (معاً) مولاتى !
الشهباء : هل فيكما من تشتري المنذر ؟
(تنفحصانه جيداً)

الجاريتان : نفحصه أولاً يا مولاتى !
المنذر : أنا المنذر بن قاطع بن فاقع بن باتع بن واقع من تغلب من بكر من وائل !
الجاريتان : عربى النسب !
المنذر : وأجيد ضرب السيف !

(يختطف سيفاً من أحد الحراس ويلعب به فى الهواء ثم يهدد الآخرين فيخافون ويثير الذعر بين الحضور ثم ينطلق هارباً)

حنظله : هرب المنذر يا مولاتى !
الفاتح : لم يُطَقْ أَنْ تَشْتَرِيَهُ جارية !
حنظله : فارس ذو عَشْمُشْمَةٍ !
الشهباء : (صارخة) وهل أنتم رجال ؟ يفر الأسير قبل أن أبيعَه ؟ أيها الحراس .. لقد أَهْدَرْتُ دَمَهُ ! طَيَّرُوا الْخَبَرَ ولا أريدُ أَنْ تَغْرِبَ شمسُ هذا اليوم دُونَ أَنْ تَكُونَ رَأْسُهُ لَدَى !

(يخرج حارس واحد)

عبد الله : (مذعوراً) بس الشمس غربت من بدرى !

أبو صباع : دا عندنا احنا هنا فى أبو الريش ..

عبد الله : يعنى هناك لسه نهار ؟

الشهباء : من تحدث أيها الغريب ؟

(الواضح انهم غير واعين)

يوجود عبد الله - لا يرويه اصلا)

أبو صباع : أنا أحداث عبد الله !

القاتح : هل نأخذه إلى الجراح يا مولاتى ؟

الشهباء : وهل فى هذا شك ؟

أبو صباع : يا مولاتى دنا صحتى مُبَّ وزى القُلَّ .. لزومه إيه

الجراح ؟ ثقى فى .. والا انتو عايزين شهادة

قومسيون ؟

الجاريتان : إن صوته رخييم ..

الشهباء : سوف يُعْلَمُكُنُ الغناء ..

الجاريتان : ما أَسْعَدَنَا به ..

أبو صباع : (إلى عبد الله) شايف الحلاوة ؟

(يتجمد الآخرون أثناء

الحوار التالى -)

مميزة التاريخ الجميل ده إن الواحد بيعيش فيه

عمر تانى .. أو أعمار ثانية على رأى العقاد ..

ويعددين دول ناس عرفوا يعيشوا .. أدى

الجاريتين اللى جاعلمهم الغنا والشعر .. ووراهم

حريم ملو القصر تَبَع الخليفة .. كُلُّهُمْ سَبَايَا

حرب .. أصبحوا مَلِك يَمِينُهُ .. لو انا طلبت واحدة

مش حَبِخْلُ عَلَى .. ولو ان آخر مرة طلبت رباب
دَخَلْنِي السَّجْنَ !

عبد الله : (مذهولاً) دَخَلْتُ السَّجْنَ فِي التَّارِيخِ ؟ إِزَاي ؟
أبو صباع : ما هي دي حلاوة التاريخ ! تدخل وتخرج زى ما
انت عايز .. وعشان كده الواحد لازم يحط حدود
وما يزودهاش .. والأ ما يعرفش يرجع للحاضر
ويعيش فى الماضى على طول ..

عبد الله : سيادتك علامة لازم !
أبو صباع : ولا علامة ولا حاجة .. أنا بس ممثل عظيم !
عبد الله : أنت مثل أعلى .. وأنا سعيد إنك استأمنتنى على
الفلوس ووريتنى مطرحها ..

أبو صباع : إنت معدن دهب يا عبد الله .. واونى تنسى إن
الحياة تمثيلية .. (مشيرا إلى باقى الممثلين)
شايف واقفين ازاي ؟ يتحركوا بس لما اعوز ..
عبد الله : بس التاريخ له قوته ... ويمكن يتحرك غصباً عنك!
أبو صباع : طب شوف ! (إلى الجاريتين) أنا المعلم الجديد !
(يعود المشهد إلى الحركة)

الشهباء : خُذُوا الْعَبْدَ مِنْ قُوْرِهِ إِلَى الْجِرَاحِ ..
أبو صباع : مَا قُلْنَا بِلَاشِ الْجِرَاحِ ده !
الشهباء : لَابُدَّ مِنْ جِرَاحَةٍ تَأْمِنُ !
الفاتح : لَنْ تَسْتَغْرِقَ سَاعَةً يَا مَوْلَاتِي .. هَاتُوا الْعَبْدَ !
أبو صباع : عبد فى عينك راجل ماتختشيش ! أنا داخل
التاريخ راجل حر .. أَلَهُوْ بِالْقِيَانِ وَالْجَوَارِي
وَأَتَمَتَّعُ بِأَطْيَابِ الْحَيَاةِ ..

الشهباء : الأسيرُ عبدٌ حتى يُقْتَدَى أو يُسْتَبَدَّلَ ..
حنظلة : وقد انقضى وقت افتدائك أو استبدالك ..
الفتاح : ولابد من جراحة التأمين .. لا تخش شيئاً يا رومى ! ما دمت ستقيم مع الحريم .. فلا بد من تأمينهن منك
أبو صباع : (يفهم أخيراً) يا نهار أسود ! تأمينهم منى ! يا نهار موش فايت ! انتو حتعملوا فى إيه !
(يهجم عليه الحراس ويقيّدونه)
موش ممكن يا ناس ! ما ينفعش ! حرام عليكم !
حارفع عليكم قضية ! هى فوضى ؟ فىن الخليفة ؟
أنا حاشتكى للخليفة ! (يضحك الجميع) فكّ وثاقي أيها الصعلوك .. (يحاول التملص منهم وهم يحكمون قبضتهم عليه ثم يضعون القيود فى يديه وسلسلة فى قدمه) عبد الله ! عبد الله ! إنت فىن يا عبد الله ؟
(يتجمد مشهد الماضى)
عبد الله : أنا هنا يا مولانا !
أبو صباع : أنا الظاهر اتزنت فى التاريخ وموش عارف ارجع ..
عبد الله : أقفل الكتاب يا مولانا ؟
أبو صباع : (بسرعة) احرقه .. قَطِّعه حتت ..
(يبحث عنه دون جدوى)
عبد الله : الكتاب ضاع يا مولانا !

أبو صباع : أرجوك يا عبد الله .. إنت عارف حيعملوا فى إيه ؟
عبد الله : (يضحك رغماً عنه) عارف يا مولانا !
أبو صباع : لازم تلاقى الكتاب .. لازم تحرقه بالنار .. قَطِّعْ
كل الكتب اللي عندي !
عبد الله : والكتب ذنبها إيه ؟ التاريخ موجود بره الكتب ..
موجود فى عقول الناس .. فى وعيها .. فى
مشاعرها ..
أبو صباع : بلاش فلسفة يا روح أمك .. إحرق الكتاب بقول
لك .. لازم حصل خلط وافتكرونى واحد تانى ..
عبد الله : استعن على الشدة بالله !
أبو صباع : يا مُفَرِّج الكروب يا الله !
(يعود المشهد إلى الحركة)
الفتاح : امضوا به .. هيا يا حراس ..
الشهباء : أريدُ أَنْ أَخْتَلِيَ بِهِ بَعْدَ الْجِرَاحَةِ !
(يبدأ الجميع فى الخروج)
ويتركون عبد الله وحده)
عبد الله : ضاع أبو صباع ! لكن الدرويش ما ضاعش ..
الدرويش موجود .. ولازم يفضل موجود ..

اظلام

المشهد التاسع

الجو يوحى بنور الصباح -
الخلوة - المسرح خال إلا من
معدات بسيطة توحى بأنها
خلوة أبو صباع - يسمع طرق
شديد على الباب فيدخل
عتريس مغالبا النوم كأنما
استيقظ لتوه ليفتح الباب)

عتريس : طيب طيب جاى أهه ..

(يدخل رجلان)

عليوة : سلامو عليكم ..

عتريس : وعليكو السلام .. خير ؟

حسين : كل خير يا عتريس يا خويا !

عتريس : (يتثاءب) إيه اللي مصحيكوم النجمة ؟

انطقوا .. قولوا ..

عليوة : يا أخى جول اتفضلوا .. نعملوا لكم شأى ..

عتريس : (نافد الصبر) لا إله إلا الله ! يا خوانا انا
مانمتش ساعتين على بعضهم امبارح .
حسين : واحنا ما نمناش .. إنما جينا نتأكدوا ..
عليوة : أصل بيحولوا الدرويش سافر !
حسين : أنا سمعت إنه طلع فوق .. سبحان الله !
عتريس : (يكون النوم قد ذهب عنه تماماً) بتقول إيه يا
راجل إنت وهو .. طلع إيه ونزل إيه ؟
عليوة : هم جالوا سافر .. سألنا فى الموجف .. عند
المرور .. جالوا ما حدش خرج م البلد امبارح ..
سألنا فى المعدية .. جالوا ما حدش عدى البحر ..
حسين : يبجى لازم طلع فوق ..
عليوة : ما احنا عارفين حالاته اللي بيطلع فيها ..
حسين : بيطلع للملكوت .. أمنت بالله .. وينزل تانى !
عتريس : بس بلاش كلام فارغ .. الدرويش موجود وان
كنتو عايزين حاجة أنا تحت امركم ..
عليوة : عايزين فلوسنا !
عتريس : فلوسكم ! يا نهار موش فايت ..
حسين : الدرويش اللي جال .. جال لنا تيجوا بكره
تلاجوها زادت سبع مرات !
عليوة : أمنت بالله العلى العظيم ..
عتريس : (يحاول أن يسترجع رباطة جأشه) طب
اتفضلوا .. أنا حانادى لكم الدرويش .. (فى
استسلام) واشربوا شاي بالمرّة بقى !

(تدخل فتحية فى
اضطراب واضح)

فتحية : صباح الخير !
عتريس : أهلا بست الكل ! إنتى كمان صحيتى بدرى ؟
فتحية : أنا ميعادى مع الدرويش دلوقتى ..
عتريس : (إليها جانباً) على الله كل حاجة تكون تمام ..
فتحية : (جانباً إليه) والله موش عارفة يا عتريس ..
عتريس : (جانباً) دانتو عاملين العقد قدامى .. والفلوس
مدفوعة بشيك قدامى ..
فتحية : (جانباً) مش عارفة ! قلبى حاسس إن مصيبة
حصلت ..
عتريس : (جانباً ثم بصوت عال) يا شيخة روى
وفرقيشى .. (عالياً) إحنا صَبَّاحْنَا نادى وَقْلَ ..
(صارخاً) فين ياد الشاى والذى منه ؟
(صارخاً) وَلَهْ !

(يدخل غلام بصينية
عليها شاى)

(تدخل الهوانم الثلاثة
تفيدة وافادات ومفيدة)

الهوانم : (معاً) الدرويش راح .. فص ملح وداب .. لازم
حصلت له مصيبة ..
عتريس : مش ممكن يا هوانم .. زمانه جاى ..
الهوانم : احنا عارفينه .. تلاقينه راح فى داهية والا حاجة ..

عتريس : يا هوانم اتفضلوا .. زمانه جاي بقول ..
الهوانم : اخرس .. راجل حمار ..
عليوة : طب وفلوسنا
حسين : والأرباح الحلال ..
فتحية : أنا عارفة ان الدرويش راجع .. الدرويش لا يمكن
يختفى ..
الهوانم : وانتى نَحْلكِ إيه ؟ يا حُرْمة يا بَجْحة يا مكشوفة ..
يا صابغة يا ضابغة يا مهفوفة .. يا مَحْلُعة يا
مَقْصُعة يا مَسْفُوفة ..
فتحية : يا هوانم حقكم على
الهوانم : يا عرة يا فرّة يا سَفْسُوفة ! يا ساهية يا داهية يا
ملهوفة ..
عتريس : (منفجراً) يا خوانًا خلاص بقى .. يالله بينا ع
البيت ..
الهوانم : البيت بيتنا والمطرح مطرحنا .. دخلك ايه انت يا
زُلْطُطحي يا أُوْطُطحي يا فُلْحُوسُ .. يا قَرْعُجي .. يا
عَرَبْجي يا مَتْعُوسُ !
(يعلو الضجيج خارج)
الخلوة ويدخل رجلان فى
حالة هياج ووراءهما رجال)
سمونة : الناس بره بتقول الدرويش هرب !
الزربون : بيقولوا خذ فلوس الناس وكُت !
فتحية : عيب ما تقولش كده على سيدنا الدرويش !

سمونة : الناس حِكْسَرُوا البيت يا ست فتحية !
الزربون : وحياة دى النعمة (مشيراً إلى صينية الشاى)
(ثم بلهجة رقيقة) واحلف بالدقة الحلوة (وفى
حالة سعادة) ومزيكة المولد النغشة ..
الهوانم : اختشى يا مَخْنُتْ يامُونْت .. يا شَايِبْ وَعَايِبْ .. يا
حَايِرْ وبَايِرْ ..
سمونة : يا عيني ع الشعر الجميل ..
(يدخل الرجال إلى الخلوة)
عتريس : أهلا باولاد بلدنا الجدعان ! (إلى فتحية)
والعمل يا ست فتحية ؟ (فى زعر حقيقى) ما
داهية يكون عملها وهرب !
فتحية : فال الله ولا فالك يا عتريس !
(الرجال يصيحون : عايزين
فلوسنا .. عايزين فلوسنا)
عتريس : يا خوانا عيب موش كده .. مش فى الخلوة بتاعة
الراجل الصالح !
(فجأة يدخل عبد الله
مرتدياً زى الدرويش وكأنه
أبو صباع تماماً)
عبد الله : السّلام على من اتبع الهدى ..
(الكل يهمس فى دهشة :
الدرويش ! الدرويش !)
أهلاً بِكُمْ فى خلوة البرِّ والصِّلَاح !

عتريس : (هامساً فى دهشة ودُعر) إنت .. إنت مين ؟
إنت اتغيرت خالص ! (يتفحصه) انت مش
أبو صباع !

عبد الله : (فى نبرات ثقة مخيفة) فَتَحْ عينك يا عتريس
كويس ! لا تَكُنْ أعمى البصر والبصيرة ! أنا عمك
الدرويش .. «وأغشيناهم فهم لا يبصرون» ..
«وعلى أعينهم غشاوة» صدق الله العظيم ..

الهوانم : (معاً) مالك اصفرت واخضررت وازرقيت ..
عبد الله : صَمْتًا يا ذوات اللسنة المشقوقه .. (صارخاً)
اصمْتَنَ وَالْأُطْلَقْتَنُ جميعاً !

الهوانم : (معاً) عيني علينا وعلى حوالينا .. إحنا وَلَيَّا
ومين لنا !
عبد الله : (صارخاً) اخرجن على الفور .. هذا أوانُ جَدِّ لا
هَزْل ..

(تتوارى الهوانم)
عليوة : احنا جينا نتبرك بمولانا ونسأله ..

عبد الله : عارف ! فلوسكم زادت سبع مرات .. خُذُوا ..
عُدُوا .. (يلقى إليهم بزمبيل ملىء بالأوراق
المالية) عد يا حسين انت .. عليوة حمار ..
مالوش فى العدد !

حسين : يا منت كريم يا رب ..
عبد الله : (ينهمك فى عد النقود)
واللى عايز فلوسه قبل ما تزيد يقول ..

سمونة : زادت سبع مرات ؟!

الزربون : يا بركة مولانا الدرويش !

عبد الله : مين عاين فلوسه قبل ما تزيد ؟

(صمت متوتر وهمس)

(بين الرجال)

عبد الله : (مستمرًا) الحاج غضبان شعير ساب ألفين

امبارح .. النهارده بقوا أربعناشر .. خد !

(ويلقى إليه بصرة) والباقي لسه فلوسهم بتزيد !

سمونة : أنا حاستني لما تزيد !

الزربون : لو سمح مولانا نستنى شوية !

عليوة : واذا رجعنا الفلوس دى .. يعنى (يتهامس مع

حسين) ممكن تزيد ؟

عبد الله : كُلُّهُ فى علم الغيب .. ماذا يدري الإنسان عن

مصيره .. وماذا يعلم عما كتب له ! احنا يا

اخوانى ضيوف فى هذه الدنيا .. وأموالنا قرض

حسن من الله سبحانه وتعالى .. وبالأمس كنا

نفكر .. والله هو المدير أسبغ على الشباب ..

وأعادنى إلى الحياة فى هذا الزمن .. ومضى

عنى الشيب .. مضى الشيخ القديم الذى كان

يعيش فى الماضى .. وحل محله شاب يعرف الله

ويقدره حق قدره .. قولوا معى .. لا إله إلا الله ..

(الجميع يردد : لا إله إلا الله)

حسين : لو سمحت .. خلى الفلوس عندك .. يمكن تزيد ..

عليوة : وان مازادتش مش مهم ..
حسين : كفاية إنها عند الراجل الطيب ..
عبد الله : مين عايز فلوسه ؟ حد عايز فلوسه ؟
حسين : اتفضل ! (يلقى إليه الصرة)
سمونة : خليها عندك
الزربون : أنا عايز بركاتك !

(الناس تههم في سعادة)
عبد الله : ودلوقتي بقي .. اتفضلوا كلكم .. خدمهم يا
عتريس على برة .. لا .. خليك انت هنا .. انت
والست فتحية ..

(يخرج الجميع ما عدا
عتريس وفتحية)
فتحية : (في تردد) أنا في حلم والآ في علم ؟!
عبد الله : الحياة الدنيا حلم طويل !
فتحية : أنا ودني ما يخيلش عليها الصوت الغلط .. انت
(بعد تردد) عبد الله !

عبد الله : أنا الدرويش !
عتريس : (في حالة ذهول) والمعلم ؟ المعلم راح فين ؟
عبد الله : (في لهجة صارمة مخيفة) وأنا مش عاجبك يا
عتريس ؟ أنا دلوقتي في إيدي كل حاجة ..
الفلوس والأوراق .. وأهم من ده ومن ده .. الأسرار !
عتريس : زى ما يكون قلبي حاسس .. (رغمًا عنه تفلت
صيحة) يا بن القرندي ! لحقت تكوش ع العملية ؟

فتحية : اتحشم يا عتريس ..
عتريس : دا عبد الله يا توجة .. عبد الله المحامى ..
المغنواتى ..
عبد الله : يعنى عايز تقطع عيشك ؟ عايز تتكل على الله ؟
عتريس : (فى زهول مرة أخرى) أقطع عيشي ؟ أبوصبا ع
فين ؟ انت قتلتته ؟ (خائفاً) عملت فيه إيه ؟
عبد الله : حاشا لله ! (فى لهجة عميقة مخيفة)
أبوصبا ع كان الحلم وأنا العلم ..
فتحية : لكن دا أنا كنت معاه امبارح .. وكلمته وكلمتى ..
عبد الله : قَصْدُكَ كَلِمَتَيْنِ وَكَلِمَتُكَ وَاتَّفَقْنَا عَلَى الشَّرْكَةِ
وَالْجَوَازِ .. أَقُولُ لَكَ قَلْنَا إِيَّاهُ بِالضَّبِيطِ ؟
فتحية : (تختلط عليها الأمور) أرجوك أنا .. موش
عارفة أقول إيه .. أنا الظاهر ما نمتش كويس !
عبد الله : لا .. نمتى كويس قوى .. اللى انتى قابلتيه
وكلمتيه كان درويش وَعَدَ يديكى الفلوس ..
والفلوس أه .. (يسلمها شيكاً) والعقد أه ..
(يسلمها العقد)
عتريس : (فى نفس الحيرة) يا ناس نافوخى حيفرقع !
مش أنا اللى أخذت لك العقد عشان تمضيه
وتوضبه ؟
عبد الله : أنا اللى عطيت لك العقد .. (فترة صمت) عايز
تسببنى وتشتغل فى حته تانية ؟
عتريس : (بسرعة) وده معقول يا معلمى ؟

عبد الله : (يضحك) يبقى كده اتفاهمنا ..
فتحية : بس أبو صباغ ..
عبد الله : أبو صباغ يا فتحية كان فكرة .. درويش ..
والناس عايزة درويش ..
فتحية : لكن انت عبد الله .. دلوقتي عامل درويش ..
عبد الله : زى ما انتى عاملة غازية ! كلنا بنعمل .. يعنى
بنمثل والا بنقول .. احنا مين ..
عتريس : هو معلمى الدرويش .. هو أنا حاغيب عنه ؟
عبد الله : شفتى عتريس لبس الدور ازاي ؟ عتريس طول
عمره بيمثل .. بس أصله مش ممثل عظيم ..
الممثل العظيم هو اللي يقتنع بدوره لحد ما يعيش
فيه .. ويضيع فيه .. (صمت) وده اللي حصل
لأبو صباغ ..
فتحية : ضاع فى إيه ؟
عبد الله : أبو صباغ رجع للماضى واختفى فيه .. نصه
كان هنا .. اللي هو انا .. ونصه فى الماضى ..
وده اختفى ..
عتريس : الهوانم ع الباب يا مولانا ..
عبد الله : (ضاحكاً) آه .. الهوانم ! خَلِيْهُم يَخْشَوْا ..
(تدخل المنقبات الثلاثة)
عبد الله : دلوقتي بقى عايزة تعرفى ازاي باعرض عليكى
الجواز .. وانا متجوز الجماعة دول ؟
عتريس : اتفضلوا يا هوانم .. اتفضلوا ..

فتحية : (فى حرج) تسمع لى انا .. (تتجه إلى باب الخروج)
عبد الله : رايحة فين ؟ لا لا لا .. دول مش غرب ! برضه
بيمثلوا .. وما عندهومش مانع انى اتجوز ..
الجواز نص الدين .. والا ايه يا جماعة .. قولولها
انتو مين ..

(تخلع الهوانم البراقع)
فيبدو ثلاثة صبيان)

فتحية : رجاله ؟ موش ممكن !
عبد الله : وعشان كده الدرويش كان بيحلم بالجواز ..
عشان كده قالك - افكر انا قلتك ايه ؟
فتحية : قدام الناس .. يادى الكسوف !
عبد الله : ناس مين ؟ الولاد دول ؟ دول ولاد أخويا ..
عتريس : ولاد الحاج صبحى بتاع البر الغربى !
عبد الله : وبيموتوا فى التمثيل ..
الهوانم : ولایا وغلایا .. كلتنّا الديابا ..

(يضحك الجميع)

عبد الله : فتحية ! الفنان مالوش الافانة .. والفرقة
فرقتى .. وشغلها هو شغلى .. إذا كنتى تقبلى ..
فتحية : أقبل ؟ أقبل ايه ؟
عبد الله : تتجوزينى طبعاً !
فتحية : عايزنى اقول ايه ؟
عبد الله : ماتقوليش .. أديكى قلتى .. وحنفضل نمثل ..
البلد عايزة درويش .. والناس عايزة مغنى ..
والجواز عايز شهود .. فين الشهود يا عتريس ؟

عتريس : (يجرى إلى الخارج) حمامة يا معلمى !
(أثناء خروجه يصطدم
بأعضاء الفرقة داخلىن)

استنى انت وهو .. رايجين فين ؟

فتحية : دول الفرقة يا عتريس ..

عبد الله : وماله ؟ عز الطلب ! اسمع يا ريس شنشال .. أنا
والست فتحية حنتجوزوا الليلة .. وحنعملوا فرح
محترم .. واللى حتحييه هى فرقة الفن الشعبى ..
(إسلام وتعود الإضاءة على

مشهد الرقص والغناء الختامى)

فتحية : شَوْفُوا النُّعِيمَ اللى بَيَرْفَرَفْ عَلَى الدَّرْوِيشِ

نَفْحَةَ مُبَارَكَةٍ مِنَ التَّقْوَى فِي أَبُو الرِّيشِ

المَوْلَى بِحُجْبَةٍ وَهِيَّ لَهُ صَنِيعُ الْخَيْرِ

جَمَعَ النُّصَاحَةَ مَعَ الْإِيمَانِ وَغَيَّرَهُ مَا فَيْشُ !

حُطُّوا فُلُوسَكُمْ تَزِيدُ عِنْدَهُ سَبْعَ مَرَّاتُ !

قُولُ أَلْفَ مَرَّةٍ وَمِنْ عَارِفِ رِضَا الْبَرَكَاتُ !

بِالْحُبِّ وَحْدَهُ أَعِيشْ وَأَطْلُبْ رِضَا الرَّحْمَنِ !

وَبَقْلِبِي وَالْإِيمَانَ حَابِلِكُمْ هُنَا وَإِحْسَانُ !

هِيَ الْفُلُوسُ اللى تَحْيِينَا

وَتَحْيِي الْحُبَّ !

دَا الْقَلْبُ لَوْ غَايَتْ فُلُوسُهُ .. يَمُوتُ الْقَلْبُ !

الْفَقْرُ حَشْمَةٌ جَمِيلَةٌ وَسْتَرِي يَا وَلَدَاهُ !

مِنَ اللَّيِّ قَالِ إِنِ أَمْوَالِ الْفَنَى تَرْعَاهُ ؟
بِالْحُبِّ وَحْدَهُ يَنَالُ سَعْدُهُ وَكُلُّ مَنَاهُ !

منيرة : (تغير النغمة)

الراجل يا بنات ما يعيبه .. غير جيبه !
والفقر اذا جأله نسيبه ..

سعدية :

يَلْقَى نَصِيْبُهُ !

منيرة :

رَبِّي يَكْمَلُكُمْ بِعُقُولِكُمْ يَا بَنَاتِ وَيَخْلُقُكُمْ لِيَهْ

عبد الله :

دَا كَلَامُ مَا يَخْلُصُ الدُرُوشَ .. وَلَا فَتْحِيَّةُ !

اللِّي رَمَاكَ عِ الْحُبِّ رَمَانِي .. كَيْشْ وَعَطَانِي

فتحية :

مَالْ وَسَقَانِي .. بِخَيْرِهِ مَلَانِي وَكَانَ حَلْوَانِي

قولوا من تاني ..

اللي رماك .. الخ

الجوقة :

جُوهْ عُيُونِي حَلَاوَةٌ فَرَحُهُ وَبُنْيَانِي

فتحية :

بَا حَلْمُ فِيهَا وَادَارِي بِنُورِهَا جُرْحُ زَمَانِي

قولوا من تاني ..

اللي رماك عِ الحب .. الخ

الجوقة :

أَرْضِي رَوَاهَا بِعَطْفِهِ الْحَانِي .. زَرَعَ بُسْتَانِي

فتحية :

عَرْدَ طَيْرِي .. وَفَتَحَ وَرْدِي .. عَلَى أَغْصَانِي

قولوا من تاني ..

اللي رماك .. الخ

الجوقة :

كُلُّ مَا خَيْرُهُ يَزِيدُ يَدِينِي .. نَعِيمُ سُلْطَانِي

فتحية :

الدريش والغازية - ١١٣

جَانِي بَحْبَهُ جَمَالُ رَبَّانِي .. وَأَخَافُ يَنْسَانِي
قولوا من تانى ..

الجوقة :

اللى رماك .. الخ

فتحية :

يَا لَلِّى مَلَيْتُ بِالْعِزِّ حَيَاتِي .. وَصُنْتُ كَيَانِي
بِيكِ وَدُعْتُ عَذَابَ الْفَقْرِ وَدُنْيَا هَوَانِي
قولوا من تانى ..

الجوقة :

اللى رماك .. الخ

فتحية :

خَايِفَةٌ أَنْ عَبَتْ إِعْوَدُ لِلوَحْدَةِ مَعَ أَحْزَانِي
أَرْجَعُ أَجْوَعُ وَأَمْدُ أَيْدِيهِ .. وَكَانَتِي وَمَانِي
قولوا من تانى ..

الجوقة :

اللى رماك .. الخ

فتحية :

رَبِّى يَخْلُقُكَ دَائِمًا جَنَّبِيْ حِصْنُ أَمَانِي
أَنَا جَارِيَةُ إِحْسَانِكَ لِيَّهِ أُمِرْتُ تَلْقَانِي
قولوا من تانى ..

عتريس :

أَنَا وَيَا الْهَانِمُ فَتَحِيَّةٌ فَكُلِّ كَلَامُهَا
الْمَالُ هُوَ عَصَبُ الدُّنْيَا وَفَتَى أَحْلَامُهَا !

فتحية : (تغير النغمة)

وَرَيْنِي قِرْشَكَ تَنُؤُلُ حُبُّكَ وَمَقْصُودُكَ
أَدْفَعُ وَفَنَجِرُ تَلَاقِي الدُّنْيَا ضَاكِكُهُ لَكَ
وَأَنْ تَاهَ حَبِيبُ غَيْرِهِ .. قِرْشَكَ يُقِفُّ جَنْبُكَ
ذَا الْقِرْشِ بَيْتُكَ إِذَا فَاتَكَ حَنَانُ أَهْلِكَ

المجموعة : اللّٰى فى جيبه قرش صاع

يَبْقَى يساوى قرش صاع

عبد الله : والحبّ راح فين والهيام ؟

المجموعة : اسكت بلا قلبان دماغ !

فتحية : احنا بدينا بالغرام

وَحَوَّتْنَا ناسنا بالكلام

دلوقتى نختم بالسلام

احنا ورائدنا الهمام

فين المعلم اندهوه

وان كان مسافر رجعوه

(يدخل ابو صباع فيحدث

هرج ومرج)

ابو صباع : انا كنت شعلّة وانطفئت .. صارت رماد !

المجموعة : انت بديت اللعبة دى .. شوف الحصاة !

فتحية : مين اللّٰى ينسى حكمتك ويا الولاد ؟

عبد الله : خليت بلدنا جوهرة وزينة البلاد !

ابو صباع : انا كل مرة باغيب شوية لكن باعود

صلّوا على خيّر الأنام

أنا عندي كلمة فى الختام

واللّٰى حاقوله لا يعاد !

عتريس : انا ما اعرفكش .. قول انت مين ؟

ابو صباع : أهو هوده كُـل المراد !

عتريس كَمِئَلْ صَدَى الْكَلَامِ
ومرأية فُتْدَام الْعِبَادِ
فيها يشوفوا خيالَ وَّيَادِ
أنا ما اعرفكش .. قول انت مين
اسأل ولادنا البَطِييْنِ
دول يعرفونى من سنين
وان كنت ماشى مستكين
وضحية للماضى الحزين
لازم حاعود وفى يوم قريب
واسستنوا إعلام بالوصول
صَلُّوا على طه الرُّسُول !

عتريس :

أبو صباع :

(تحية الجمهور وتهبط
الستارة)

النهاية

كتبت هذه المسرحية في صورتها الأولى عام ١٩٩١ أى بعد عشر سنوات من المجاذيب (التي كتبت عام ١٩٨١، وقدمت على المسرح (الطليعة) عام ١٩٨٣ ونشرت عام ١٩٨٦)، وكانت آنذاك مسرحية «مستوحاة» من عمليات توظيف الأموال التي شغلت الرأي العام فترة طويلة آنذاك، وتضاربت بشأنها الآراء خصوصاً بسبب تستر أصحابها بالدين، واشتداد ساعد السلفيين الذين شاعت تسميتهم بالأصوليين (ترجمة لكلمة FUNDAMENTALISTS) وكان المقصود بهم دعاة العودة إلى أيام الاسلام الأولى أى إلى أيام الأسلاف وهى فترة غير محددة من فترات التاريخ الاسلامى قالوا إنها تمثل الإسلام خير تمثيل وكان الرمز الأول لهذه الفترة شكلياً محضاً، أى أنه كان ينحصر فى إطلاق اللحية وارتداء الجلباب الأبيض، وتكوين «زيبية» فى الجبهة «تدل» على ممارسة الصلاة.

وكانت المسرحية فى صورتها الأولى موجهة للسخرية من الخداع المتستر بالدين، مثل المجاذيب، وكنت أحاول فيها متابعة ما حدث لأبطال المجاذيب وأهمهم أبو صباغ وتابعه عتريس، بعد أن لفظهما

مجتمع البلدة الصغيرة المجاورة لالاسكندرية (اسمها أبو الريش) فخرجوا منها بعد أن أقسما أن يعودوا بعد حين. واشتبك مع خط الأحداث في تلك المسرحية خط آخر هو خط الموسيقى الجديدة التي تشبه الموسيقى الشائعة بين طبقات الشباب في الغرب والتي برزت في الستينات أول الأمر وأطلق عليها من باب التملح لفظ الموسيقى المحبوبة أو الشائعة (POP) وهو اختصار لكلمة POPULAR - تفرقة لها عن الموسيقى الشعبية التي تنتمي إلى الفنون الشعبية التي يطلق عليها اسم (FOLKLORE).

وقد اتسمت هذه الموسيقى الجديدة بالإيقاعات «الجاهزة» المسجلة أو المولدة على آلة الأورغ (وهي اختصار وتحريف لكلمة الأورغن). وابتعادها عن صلب الموسيقى الشرقية وإيقاعاتها، وخصوصاً أرباع النغمة، ولاغرو فان الآلات التي تستخدمها لا تتضمن هذه الأرباع وأهمها آلة البيانو، وبعض الآلات المشابهة لها مثل الأكورديون والأورغ، وبعض آلات النفخ مثل الكلارينيت والأوبوا والسكس، بل وبعض الآلات الوترية التي أدخلها عبد الوهاب فيما أدخل من آلات إلى الفرقة الشرقية المستحدثة وأهمها الجيتار والماندولين والبرق.

وكنيت أرى في الظواهر الثلاثة المذكورة سمة مشتركة تربط بينها وتوثق صلاتها ألا وهي الخداع - فالتظاهر بأن فوائده رأس المال تتضاعف إذا استثمرها من لا دراية لهم بالاقتصاد، ومن يتمثل فضلهم الوحيد في عدم التعامل مع المصارف بسبب فوائدها «الربوية»، خداع، وارتداء الأردية البيضاء وإطلاق اللحي، ابتغاء عرض الدنيا الزائل خداع وبيع الانتاج الموسيقى الجديد (الذي لا هو شرقي ولا هو غربي) باعتباره موسيقى محبوبة أو شعبية، خداع، وفي أعماق هذا

الخداع صراع أقل ما يوصف به أنه صراع درامى، فهو صراع بين القديم والجديد، أو ان شئت بين الماضى والحاضر، بل انه لصراع بين مقومات الشخصية العصرية نفسها وانتماءاتها، تلك المقومات طالما «عملت» معا فى توافق وتناغم، والواقع أن توافقها وتناغمها هو الذى يحدد «شخصية مصر» كما أثبت العبقري الراحل جمال حمدان.

وما ان فرغت من كتابة المسرحية ودفعت بها إلى المخرج الفنان عبد الرحمن الشافعى، واتفقنا على عرضها فى ذلك الصيف نفسه، حتى خرجت إلى المسرح عدة مسرحيات تتناول عنصرا من عناصر مسرحيتى وهو توظيف الأموال، وكانت اثنتان منها فى مسرح الدولة، فترددت وتردد المخرج، وحبست النص فى درج المكتب، وإذا بالأحداث السياسية المتلاحقة تصرفنا جميعا عن هذا الموضوع وأمثاله، وأهمها الحرب العراقية التى استمرت سبعة أشهر (أغسطس ١٩٩٠ - فبراير ١٩٩١) وما جرته فى أعقابها من انهيار فى الروح المعنوية العربية والتساؤلات وعلامات الاستفهام التى طفقت تتراقص أمام أعين العرب كلهم. ووجدت أن يدى قد شلت عن الكتابة، بل لم استطع حتى كتابة مقالات «الأهرام» الأسبوعية، وفى نهاية العام اتصل بى الفنان كرم مطاوع ليخبرنى أنه بصدد اخراج مسرحيتى الشعرية جاسوس فى قصر السلطان - وفعلا قدمها المسرح القومى فى الشهور الأربعة الأولى من عام ١٩٩٢.

وكننت على امتداد فترة الحرب العراقية أطرح على نفسى الأسئلة الأكبر والأشمل من قضية تألف مقومات الشخصية المصرية، وأهمها قضية الخداع على المستوى العربى بل والمستوى الدولى، والمزايدات فى التمسح بالدين، ولجوء كل من يبغى مغنما فى هذه الدنيا إلى

الصياح باسم الاسلام ، بل لقد عين الكثيرون أنفسهم حججا فى الدين يصدر عن الفتاوى باسمه، وينعتون من يخالفهم الرأى بالكفر والالحاد، وتحولت «العلامات» التى تحكم العلاقات الفردية والوطنية، والدولية إلى «رموز» و«شفرات» دينية، بل لقد حل الخوف محل الاطمئنان فى قلوب المؤمنين وبسرعان ما انفجرت الصراعات الدامية بين السنغال وموريتانيا جارتها، وسقط آلاف الضحايا الذين لم يأبه العالم «المتقدم» لهم، فقد كانوا مسلمين وكان لونهم أسود، كما انفجرت الصراعات فى أوروبا وراح ضحيتها المسلمون أيضا فى البوسنة والهرسك، ولم يأبه العالم لهم أيضا ولو أن أجهزة الاعلام قد أبدت بعض التعاطف معهم لأن لونهم أبيض، فالعالم مشغول بما يسمى بالمصلحة، وجمع المال وفى غمرة انشغاله بجمع المال أصبح يتوسل بعبارات مثل التغلب على الانكماش الاقتصادى ، أو تحقيق النمو أو رفع مستوى المعيشة !

كانت السنوات التى تلت انهيار الاتحاد السوفيتى والدول الدائرة فى فلكه فى أوروبا سنوات حافلة بالصراعات العرقية، و«القومية» ، وكان الخلط القديم ما يزال قائما بين «الإسلام» باعتباره ديناً سماوياً رفيعاً وبين المسلمين، كما اكتسب ذلك الخلط اضطراباً فى المفاهيم انعكست آثاره على بلادنا حيث لجأ الكثيرون هرباً منه إلى الماضى، وإن كانوا لا يهربون إليه هذه المرة ابتغاء النقاء والصفاء بل ابتغاء ما رأوا فيه الحياة المثلى، وعدت فى صيف ١٩٩٢ إلى المسرحية وقد صح عزمى على تجسيد الخلط بين الماضى والحاضر أو بين صور الماضى والحاضر، فى اطار الصراع الدرامى الذى ألمحت اليه ، خصوصا بعد أن انتهيت من قراءة بعض الكتب التراثية وعلى رأسها تاريخ الرسل والملوك لابن جرير الطبرى، وإعادة قراءة الأغاني للأصفهاني قراءة

متمهلة، ثم وقعت فى آخر عام ١٩٩٢ فريسة المرض العياء الذى كتب الله شفائى منه بعد شهور طويلة من المعاناة والجراحات المتوالية فى مستشفى منعزل فى ضاحية من ضواحي باريس، وعندما استأنفت العمل فى المسرحية فى صيف عام ١٩٩٤، كانت الصورة قد اتضحت لعينى، وأرجو أن يجد القارئ ملامحها فى النص بالوضوح نفسه .

المسرحية الجديدة اذن مسرحية «مركبة» - بل تكاد أن تتكون من «مسرحيتين» إذا اعتبرنا، وفقاً لأرسطو، أن وحدة الحدث هى جوهر المسرحية، ولكن حجتى فى ذلك هى أن «الوقائع» التى تجرى فى اطار أحداث الماضى هى التى تفسر أحداث الحاضر، واختفاء «أبو صباغ» فى ثنايا الماضى محتوم لأن قرينه عبد الله يحل محله فى أحداث الزمن الحاضر، وعنصر الفانتازيا، أو الحدث الخيالى الخارق، محتوم أيضاً، لأن أبى صباغ لا يعيش الحاضر الا تمثيلاً، فهو ينتمى إلى الماضى، ولا بد له من العودة إليه. فاذا اعتبرنا أن التمثيل، أو ما أسميته بالخداع، هو مفتاح الظواهر الاجتماعية والثقافية الحاضرة فى مجتمعاتنا، وجدنا أن الحدثين يمثلان حدثاً واحداً، وهو حدث لا ينتهى فى الحقيقة بنهاية المسرحية، لأن عبد الله يقوم اليوم بدور أبو صباغ، وهو يستمر فى عمله على مستوى الخداع وان توسل بوسائل أخرى .

ولذلك فأننا أتطلع، إن كتب الله لى الحياة ووهبنى سنوات أخرى على ظهر هذه الأرض، أن أنظر فى أمر عبد الله وما آل إليه بعد زواجه من فتحية، وما آلت إليه شركة الكاسيتات التى كونتها - فرقة شنشال للفن الشعبى - وما آل إليه أهل أبو الريش بعد أن عاد معظمهم من البلدان الغنية المجاورة وعادوا إلى العمل بفلاحة الأرض .

وتبقى كلمة أخيرة بخصوص الشيء الذي وضعته على السنة الأبطال: أما شعر الوليد بن يزيد فهو موجود في الأغاني (ج ٧) وكذلك البيتان غير المنسوبين عن انحرافه وأما ما يأتي على السنة سائر الشخصيات بالفصحى أو بالغامية فهو موضوع، وهو يمثل جزءاً أساسياً من أجزاء الحوار - ولذلك وددت تنبيه القارئ فانا - على إيماني بأن حياة المسرحية الحقيقية لا توجد إلا في المسرح - أعتقد أن هذا النص يصلح للقراءة وأن قراءته دون تمثيل يمكن أن تؤتي بعض الثمار.

أرجو أن أكون قد وفقت في هذه التجربة الجديدة، والتي لا أزعج أنها جديدة كل الجدة، لا عربياً ولا عالمياً، وكما أرجو ألا يخل على القراء والنقاد بأرائهم حتى أسترشد بها في متابعة حياة عبد الله - إن شاء الله تعالى أن يمد في عمري.

والله الموفق

محمد عناني

جنيف - ١٩٩٤ م

مطابع الهيئة المصرية العامة للكتاب

رقم الايداع بدار الكتب ١٩٩٤/٨٩٧٣

I.S.B.N. 977-01-4131-3